

銅鼓書堂遺稿

銅

110531

戲臺

金爐
文爐
書
堂

銅鼓書堂

遺稿

序

查君儉堂涖蜀之三年盡哀其己丑以前之作走
余戢影蘧廬發書而讀如見儉堂萬里之外頭白知交惟
兩人在儉堂之詩舍余孰爲元晏哉儉堂難兄曰蓮坡先
生耽嗜風雅狎主齊盟海內詞人靡不向風景慕同時廣
陵馬氏遙遙相望余南北往來兩家園林必畱信宿親致
師摩壘其閒而蓮坡遂繼以昏姻之好故余弟畜儉堂亦
不余嗔也

今上龍飛廷試鴻博之士得十五人餘皆報罷然輦轂人
才於斯爲盛其時水西山莊之賓客亦視前後爲最盛刻
燭分題藏鬪酒蓮坡應接無倦容而儉堂年甫弱冠肩
隨秦晉才情騰踔出示一篇則已驚其夙素猶憶史館下

直苦吟無俚餽問來自尺五城南安成之食潘園之果堆
案盈几喜動家人而儉堂蠶尾細書緘詩投贈意殷摯如
其兄自丙辰至癸亥首尾八年一旦余以言事罷斥忍痛
別去常恐前死無相見之期乃隔廿餘年余猶幸存不見
蓮坡而兩見儉堂焉儉堂以戊辰歲官農部郎尋外擢單
車赴嶺表取道與余相見於西湖會余膺羔雁之聘主講
粵秀書院儉堂自慶遠來則又相見於五羊城蓋在壬申
夏五時蓮坡下世未久見儉堂且痛蓮坡也蓮坡與余談
藝最洽儉堂之詩杼軸性靈原本忠孝猶蓮坡之教也今
披其全集少作已自可傳而傳儉堂者尤在服官以後之
作重葺黃文節公祠探湘灘二水發源處浚靈渠修秦郡
監史祿遺蹟美政藉藉人口杜拾遺一代詩史未歷方州

元道州咨嗟民瘼治具無所恢張儉堂身際 清時有猷
有爲不肖以虛聲竊盜一編治譜見於盈寸之詩前賢對
之有餘媿矣而乃仕優則學自視歛然歸裝載石清風動
林余不見儉堂而見儉堂之詩匪惟競爽蓮坡詩之有用
於世此其明效大驗矣儉堂具方圓可施之才今觀察川
北以六條計吏行且駸駸大用矣有方召之臣必有方召
之詩如江漢常武者豈以一官一邑之治爲足衡量吾儉
堂也耶姑就其所已編者而論之如此蜀道遠在天上繼
見無日余髮種種猶思揮魯陽之戈延景桑榆序儉堂他
日未見之詩也

乾隆庚寅日在西陸仁和姻弟杭世駿拜手

銅鼓書堂遺彙序

昔

仁廟時翰林查慎行以文學侍從嘗有瀛臺坐釣應

制之作曰臣本煙波一釣徒蒙

帝賞賚

內侍

每傳呼煙波釣徒查翰林以別於聲山學士

昇云而其所著敬業堂集亦遂盛行於天下故湖

南巡撫儉堂先生弱冠卽蜚聲文苑舉博學鴻詞

科試不利又困京兆試乃以貲爲農曹郎世咸謂

文章無命豈知魁偉絕特之士天必試諸盤根錯

節之交以淬其鋒而礪其鏗然後畀以重任而履

危而能安視險而如夷見義而必爲見可欲而不

動不似尋章摘句以科第顯於時而無所樹立者

故其發爲文章乃經世有用之文非徒學士謳吟之物先生之長君淳守桂林搜羅先生詩文爲銅鼓書堂遺藁若干卷致書於余乞校訂而爲之序余胡足以知先生之集然余之知先生者嘗自許在筆墨之外則筆墨所及又烏敢辭先生於書無所不窺其詩不名一體而大要則視煙波釣徒如冰之生水然釣徒未見諸事而託於詩先生之事則一一見諸詩而徵其學遭逢

明聖仕宦三十餘年南至南越西浮弱水蒼顏白髮據鞍揚揚諸番羅拜萬姓待哺仰之若父母尊之如神明而先生之勞其心力苦其筋骨不顧身不顧家犯大帥而不以爲忤折僚友而不以爲非遇倉

卒而不驚任非常而不變每於拈韻揮毫流露古君子立身行義之本固未可以晚近詩人目之也嘗試取而誦之時或驚風雨泣鬼神時或諧韶濩沮金石想其握管摘詞句斟字酌一筆不苟下大抵千捶百鍊而合於自然藉非浸淫百家陶鎔萬有其孰臻此閎中肆外從心所欲者哉吾知是集出而海內爭先觀之以爲快其與敬業遺文齊驅竝軌無疑也先生尤工於詞深得姜史三昧今附刻詩集後有德者必有言世之學者自此可知古君子之行有不徒虛車之飾者然則彪炳史冊照耀旂常而爲世楷則洵乎其枉筆墨之外也哉是爲序

金鼓書堂遺稿序
乾隆五十有七年四月既望梁溪顧光旭頓首書
於松風閣中

銅鼓書堂遺稿卷目

卷一

古今體詩七十四首

卷二

古今體詩六十五首

卷三

古今體詩七十四首

卷四

古今體詩六十四首

卷五

古今體詩六十九首

卷六

古今體詩四十二首

卷七

古今體詩六十一首

卷八

古今體詩七十首

卷九

古今體詩八十首

卷十

古今體詩八十三首

卷十一

古今體詩八十八首

卷十二

金...
...
...

古今體詩八十首

卷十三

古今體詩七十六首

卷十四

古今體詩六十首

卷十五

古今體詩六十七首

卷十六

古今體詩七十首

卷十七

古今體詩八十九首

卷十八

同...
...
...

古今體詩七十二首

卷十九

古今體詩七十九首

卷二十

古今體詩六十六首

卷二十一

古今體詩五十一首

卷二十二

古今體詩五十八首

卷二十三

古今體詩五十二首

卷二十四

古今體詩六十七首

卷二十五

詩餘五十六首

卷二十六

詩餘四十九首

卷二十七

詩餘四十三首

卷二十八

賦一首 辨一首 考一首 序六首 文一首

卷二十九

記十二首 日札一首 題名一首

卷三十

題跋四十八首

卷三十一

碑二首 志一首 行畧一首 哀辭一首 碣銘

一首 硯銘一首 上梁文一首

卷三十二

詞話

銅鼓書堂遺稿卷一

甲寅

春日郊遊

宛平

查禮

恂叔

長樂郭振聲書

野馬田閒路悠悠遠世情荒原殘碣臥古墓朽株橫農圃
非家學巖阿負隱名佇看煙景召花事競春城

落盡殘梅處無鶯拂柳條溪陰冰未解徑滑雪初消飢鵲
窺芳榼疲驢怯板橋一聲清磬響隔水寺非遙

亥市囂塵散芳津煙靄中帘斜村店靜岸闊夕陽空蘭茝
安初服園廛得古風漁樵舒嘯傲誰許話窮通

登臨非有意來去更何期蟾影穿疎樹龍聲出短籬興闌
歸覺晚境僻轉忘疲欲待桑麻長還將筆硯隨

春雨二首

雨意廉纖少客過茶參經訣佐吟哦數聲鳥語來相和爲
報梨花勝雪多

胭脂狼籍杏開時燕子尋巢飛故遲窗鎖輕寒春寂寂一
簾香雨放翁詩

針魚

長河漲新流漁艇終朝集針魚一寸餘萍浪穿不澀良無
樛漚虞詎愁笮笮及人情細亦貪趁彼漪瀾急背風使罟
網鹿角斂呼吸懷刺不善防翻同腐芥拾在肯後秦朝國
師有羅什食針如食蔬觀者皆悚立何年化此魚饗飧恣
所給物微倍宐恤生意常戢戢舍之任悠然遲將一當十
是以古洿池永無數罟入

過水西莊

小築臨春水風光宛若耶碧圍三徑柳紅閒一籬花拂座
雲生牖開門鶴到家機心從此息抱甕入桑麻

訪周月東秀才

暇日訪高士扁舟泛綠水春花依岸開眠柳因風起閒禽
向客吟馴犬迎人喜剝啄叩柴荆應門走童子茶鐺咽松
風塵談嚼宮徵窈若空山中嗒然忘城市昔聞周彥倫俯
仰隨行止歌嘯載籍酣籌畫萃名理今君磊落懷出處同
風旨時或彈素琴時或憑古几時或酒盈杯時或書透紙
玩弄秦漢章點竄南北史把卷一室內戶外常滿履流連
蘊真趣瀟灑絕塵滓幽情堅寸抱不逐浮華徒余敢謂忘
形相對無彼此茆檐挂斜曛清興殊未已醉歌徐返棹月

照波心裏

題王孝先負劍游集

醉鄉原是君家集醒後應無細碎讎斫地歌聲金石振與君含笑論吳鉤

山水歌贈陳方來處士

松風不定疎簾舉積翠森然壓院宇誰遣夸娥移此峯削成崖粵非斤斧下有流泉流汨汨寒光澹沲清毛髮便欲移家傍淺沙潺湲深處邀古月展圖閃閃光華生乃知畫法通神明龍從應有山靈助絲麗還如溪女行西巖先生愛奇傑到處探幽抉林穴冲懷磊落胸腹寬不貯繁華貯冰雪興來落墨如秋雨化學乾坤意師古逸想凝神結構成他人那識經營苦槐陰轉夏炎熇蒸贈我八尺鷲溪綾

三
下家
中
不
研
成
有
詳
善

絺衣軒軒動涼色直教虛室凝層冰王蒙倪瓚不可見餘子紛紛何足算先生畫手世所稀似向匡廬得真面柿紅之錦盤雕文沈香之軸椒蘭芬爲君什襲終千古也勝支頤對碧雲

五月晦日攬翠軒納涼

避暑無奇策開樽水竹閒香清紅藕密波靜白蘋閒蟬聚聲如雨林深翠似山石牀斜照外敲枕聽潺潺

雨後與胡文錫小酌

小酌非緣客空庭絕點埃好風吹雨去皎月破雲來坐久吟忘倦眠遲漏故催芭蕉清露下相對盡餘杯

題齋壁

一榻蕭然晝掩關壁將圖畫疊溪山夜來有夢歸何處只

在松風蘿月閒

寄懷履方仲兄

樂敘天倫醒醉同挂帆一去酒樽空音塵常在家書外夢
草還存詩卷中廿四番風花次第二千餘里雁南東秋光
應讓江淮好蟹正肥時霜葉紅

采菱歌

妾家住溪南采菱溪之北紅日映綠波照見妾顏色

舊滄州鐵獅子歌

吾聞條支之國生逸材毛如黃金尾如斗含威蓄怒肆大
聲四谷噌吰萬雷吼飛熊帖伏學醯雞猛虎倉皇類芻狗
平原曠野不代生絕域靈區閒時有麒麟而下百獸尊卓
越凡庸冠羣醜木門城邊秋日皎瑟瑟西風動衰柳忽驚

巨物扼當塗形體龐然儼岡阜高標直欲摩蒼雲平臥猶
堪橫數畝晶瑩寓目撐空睚豁達寬頤哆方口路人羣說
是獅王浴鐵爲身駭飛走爲想當年鎔鑄時鼓鞴泥鑪事
紛揉鍊精幾費昆吾金搏質還須巨靈手吁嗟創作誠神
奇磅礴陰陽事非偶一從荒煙委寂寞苔蘚潛滋積塵垢
少陵昔詠石犀行莊語詆謨蜀太守要將正道承先王不
使奇衰惑童叟我今懷古異拾遺但有摩挲無詈詬

讀南唐書

擾擾中原日東南倚柱初盤根仙李大王氣秣陵餘節儉
多遺則寬仁有令譽彭奴規畫遠拓跡盡淮徐
地逼思蠶食時平尚武功延津方得劍楚國又亾弓黃爵
窺覲密寒蟬覆蔭空數峯青峭色早晚掩屏風

願作龜茲國盈庭事晏安臣吟宮瓦曉君賦玉笙寒高髻
看新製燒槽續舊彈誰知繡餽句汴上泣金盤
一代多忠節由來愛碩儒黃花終不漲白甲漫前驅客痛
朝衣拜人稱夜宴圖翻思開國際隔水擁灰鑪

雪夜

北風吹夢醒雪片打窗響夜半耿孤燈寒逼早梅想

苦寒吟

城陰積雪凍不消林霜慘刻翔獐廳青天含愁白日淡寒
氣凜冽彌蒼寥地鑪蒙茸煨榾柮熾火如山黯無色空堂
夜坐悄無人雲際冰輪照階側繭紙細密糊深房固守無
異金與湯不分寒威利投隙如錐脫穎旋穿囊黑羊之裘
白狐腋素挾奇溫與寒敵卻怪此日咸披靡復領重裾等

絺綌我知天道固有期候當栗烈斯其時況過長至入三
九元冥布令夫何疑憶昨初冬菊未死匝地暄和物欣喜
競說梅應早得春星躔已踰元枵紀峭寒陡作來幽都刮
人睂鬢侵肌膚頓覺今時非往時側身偃蹇生嗟吁深夜
重衾冷於鐵殘燈挂壁時明滅獨笑頭如刺蝟藏夢魂難
共春雲熱豈無淺深椰子杯傾壺一使愁顏開香醪雖醇
飲戶小沙罌空致麻姑醅豈無鸚鵡青花硯濡筆狂歌追
白戰呵毫氣冷紛霜花褻手遲回神轉倦遙思窮巷簞瓢
羣無衣卒歲悲懸鶉我欲具草奏頌頊亟回旌節布陽春

乙卯

古劍行

有序

王子孝先越人慷慨有丈夫氣昨歲攜古劍策蹇北上所

著詩卽以負劔遊名集今擬南歸解劔相贈作此謝之
匣中古劔何時傳光芒豔發凌星躔昨宵啟匣聲鏘然
鏤古篆名龍泉不將珠玉炫裝飾摩挲何遂無顏色
天然寶氣迴射人未逢烈士誰賞識君不見人中皎皎鐵錚錚
鍛鍊經久功始成君家佩此憐司直曾入工部短歌行不
交輕俠重聲價風雨幾聞吼深夜卻緣宇內無不平豈必
當前動悲咤爲余脫贈試吹毛笑問何如百鍊刀物無專
主有得失仍恐龍化隨波濤君不見豐城紫氣耀九州干
將莫耶今難求人生遇合亦如此可能持此斷離愁

送王孝先歸山陰

梅花香動雪初殘春早猶餘舊臘寒歸去卻逢修禊後右
軍遺蹟醉鄉寬

恰喜南行伴我翁

時孝先隨家大
人同往浙西

深情無限別離中富春

江上帆開日好看山桃萬樹紅

春暮散步城東渡河過香林院小憩田舍晚歸

撥醅新水滿塘均潏灩晴光浸柳梢三月海螯初上市一
春江燕未歸巢澄懷豈必常高臥遠眺無妨出近郊寂歷
紺園人不到隔牆閒聽梵鐘敲
未夏先思籟笛徒耕樵相對日忘晡異書儘可懸牛角長
劔休教佩鹿盧浦口炊煙雲際密渡頭漁艇暮還呼何時
得就山中宅自翦荒榛闢芋區

楊青驛馬上口占

閒雲鬢鬢野蒼茫路入煙村客思狂萬頃桃花千樹柳一
鞭收拾在詩囊

靜海道中

策蹇平沙道春風共往還一叢花似錦數曲柳如環村酒
家家熟柴扉日日閒余非行役者何事負溪山

漢氏成園丞印歌

延陵蔓草千秋荒土中掘得古印章印文屈曲摹印體大
小篆法殊雲陽奉園宮人理妝具上飯朝朝隨服御大官
送物誰典司園令食鹽專所務二十五祠廟祭繁四時祠
祭惟陵園駿奔趨走寅夙夜職卑亦得親脈膾尚方精鑄
龜爲鼻縮繫何人亾姓字翁仲爲守竝忘年玉雁金魚同
棄置當時飛燕啄皇孫淵默空言望若神一抔黃土歸耕
牧何如此印同貞珉摩挲翠色堪人愛金石錄中昔未載
重簾夜靜生古香肘後奚須如斗大

早秋過太液池

綠水澄於雨後雲長橋倒浸彩虹分不愁緩步驚鷗散永
日眠沙自一羣

瑣闥愔愔對水開似將明鏡寫樓臺瓊華一島休嫌小直
接西山翠色來

謁辟雍

聖哲扶天造成均重

帝京瞽宗標雅化領學聚羣英萬仞宮牆闢千秋俎豆呈
登山寰宇小觀海望洋驚地接辰居迴時逢當代清撻鏞
恢虞業釋奠肅冠纓魯宅猶存壁秦灰久滌坑三川迴地
軸一柱向天擎鳳彩流丹堊麟文動旆旌星輝匏似繫玉
振瑟還鏗轍跡無餘夢章縫在兩楹春秋垂特筆陳蔡失

專征庠別東西序鐘舍大小鳴上尊期取爵祭菜念和羹
且得從公邁仍思稽古榮說經慙嶽嶽談史羨觥觥潔已
師童子無聞忝後生幸蒙五世澤敢負四時行偃僂威儀
重趨踰步武輕典書纔鼓篋奉席比橋衡韓愈師堪式何
蕃業遂精大昕從始教末坐敢張聲

聖世漸摩治

皇猷夙夜宏講堂曾顧室闕里早除荆遣士由文黨觀光
自漢明然藜傳太乙習樂紀先庚車服崇瞻仰弦歌淑性
情於論歸首善思樂在昇平苦卓人堪鑄羣言液盡傾馨
香徵禮物鳧藻喜難名

棘闈中秋

秋色平分天宇空依然桂影廣寒宮青燈三載今宵月一

片吟心萬舍同

寄履方仲兄

十年窗下石爲田待辟湖州愧昔賢籬外黃花人共瘦誰
憐顛顛晚風前
數行書就憑雙鯉三百篇中感鵲鴿未得鯤鵬成一變不
如柳絮化浮萍

歲暮周月東招飲卜硯山房出觀所藏書畫

晴雲炙窗寒色淺翠幕無風春衍衍主人愛客情意深籤
軸繽紛遞相展古錦葡萄芍藥紋名牋碧玉金花繭活色
生香盡陸離膠山絹海相夷演水石羣稱董巨高花枝共
道崔徐鮮斑斑古色溢睂稜如際夏商見瑚璉神品逸品
總絕奇天工人工我何辨是時繞室鑪煙清幾點疎梅茁

金華書院藏書
枯蘚大白頻浮興轉豪指揮不覺金烏轉滿目琳琅秀可
餐絕勝天厨嘗禁鬻別有珍奇什襲多鼎彝章印紛華變
矜高不易五城觀鄭重眞同萬錢選君不見道旁瓦礫積
轉深稂莠嘉禾各相眩知己無多識者稀奇材常受風塵
覬摩掌躑躅一悵然新月初來暮簾捲

丙辰

乾隆元年元日

鳳闕新頒正朔書龍飛大有一元初九天瑞靄升紅旭四
海黔黎仰紫虛

帝德漸看滋草木春風早喜襲襟裾從今擊壤歌應徧願
頌椒花萬歲餘

試燈日招吳焦音上舍家如岡姪飲味古廬卽席

分賦盆花得十三元

馬塍巧技長兒孫小白嫣紅徧瓦盆賀歲杯前初弄影試
燈風裏最銷魂如雲繭紙朝猶護宿火甄鑪夜尚溫回憶
南西門外路豐臺都是養花村

諸葛銅弩歌

生不能回身挈腳隨材官手持白竹擒樓蘭又不能運斤
削木隨巧匠采榦恆山入幽嶂窮年埋首事蠹書遠稽秦
漢追唐虞昨朝市中偶得銅器一似簡非簡觚非觚歸來
徧閱古器圖有物塊磊形相符云是諸葛武侯所製元戎
弩用以左射右射從前驅青錢斑斑凝綠蕪圓軸宛轉如
門樞箭槽一道中間劄惜哉今時無人解此器不然試之
百步千步可廢雙鞬弧淮南有遺語銅不可爲弩其言荒

誕無足徵視此尤堪醒愚魯武侯固是天上人留貽小物
皆稱神銅鼓至今讐蠻服木牛當日通秦軍弩隨八陣守
堅壁幾聞猛將迎鋒鎬渭水祁山杳無跡往事空吟籌筆
驛君不見白帝城南砂磧中亂石瑟瑟生陰風梁來法和
箭鏃空於後誰復知良弓

哭老僕周喜

周喜先祖遺僕也勤勞素著年八十餘死而無子詩以慟
之

吾家有老僕四世相追隨年已踰耄耄筋力難展施回首
念昔時殫心不知疲致身事遠塞目無少年兒辛苦汝備
嘗故舊我官遺可憐衰朽質煢獨鮮扶持無何一室中奄
忽與世辭人生如草木朝夕有榮萎貴賤共一瞬惟忠足

昭垂因之爲揮淚詞以示來茲

登稽古寺藏經閣

峻嶒高閣出城西百里晴雲接檻齊擬把清吟驚碧落不
辭驕馬踏春泥粥魚聲過收蓮梵貝葉函深覆錦綈莫信
芳菲時節早隔林無數露鶯啼

矮屋衡門繞四周煙光低向足閒流平田乍見新蕪合遠
水還看曉鏡浮綽約最憐緣岸柳清閒誰及臥沙鷗日斜
鈴語當風急似喚遊人更少畱

新釀棗香露初熟獨酌賦此

小院花深月正團詩懷欲共酒杯寬試將東老新傳法忘
卻西鄰舊撲竿豔奪春華濃似露醉憐氣味靜於蘭海塢
應笑安期誤長使如瓜歲歲乾

金堂書室遺集卷一
春暮坐繡野移

野色春如繡齋空燕坐宜蘆芽初刺岸荷葉欲抽池避俗
思栽竹論材擬樹橙朝來風力軟牆外去帆遲
田野饒幽趣分畦繞綠波漁汀窺似鏡蝌蚪聚成窩架小
青藤密山平紫芥多鄰翁談稼穡攜杖日相過
閒階一雨後習靜似僧房初月蛾眉淡新槐鼠耳長汲泉
烹活火選句貯空囊何必深巖隱塵氛始盡忘

和家漢客兄水西莊雅集原韻

水外園亭曲徑偏深林初夏日如年好花香散藤蘿架修
竹陰搖書畫船薄酒數杯聊就席野蔬一翦亦稱筵最憐
嫩捲田田葉浮動池塘淺漲邊

小聚茆堂作偶然遊心溪口共山巔催來夏景迎梅雨消

去春光剩柳煙紫燕銜泥斜照裏新篁解籜晚風前詩添
清韻流絃外不讓西園雅集篇

年窠墨注歌

國朝陶器美無匹邇來年窠稱第一不讓汝定官哥均何
況永樂之坯宣德質卽此墨注如水壺下廣上弁豐而虛
置之几席斑管俱隄麋一斗可以擘窠書清光淡淡照硯
北云是雨過天青古時色神螭躩踞繞其柄鐵足周遭黝
如墨下有小篆曲阜文觀者從此辨僞真君不見右軍臨
池池水黑至今猶浸越山濕我欲從之挹殘汁

五松

偶讀崔融賦餘情徧五松但須天闕近不羨大夫封色蔭
寒廳古陰分翠巖濃著書忘歲月恐汝忽爲龍

沈貞女

有家未及母命之郎面不識數亦奇十三既許徐家子妾
心誓與同生死自古鬱生義如此入門拜姑嫜姑嫜莫旁
皇由來妻道比臣道不學王珪魏徵千載令人誚

秋日過張氏一畝園感舊

滿目秋光落葉黃故家風物感蒼蒼繁絃急管飄零盡惟
有寒蟬噪夕陽

羅綺成叢轉盼空野花猶作舊時紅砌邊多少閒金翠寂
寞荒煙蔓草中

三千珠履盡能文坐上雄談蔚似雲朱亥侯嬴俱老去不
知誰憶信陵君

秋夜味古廬獨坐

商飈掠樹響騷騷漸覺寒威透敝袍滿院黃花蛩語急一
窗明月雁聲高清名何必追龍腹妄念多如卷鷺濤聞說
濁醪存妙理不妨左手更持螯

節烈四婦歌 有序

天津舊有三婦合葬焉一為譚某妻陳氏一為阮某妻諸
氏以烈死一為趙某妻裘氏以節死乾隆元年八月十八
日金振妻丁氏無子視夫含殮畢旋殉柩側里人請諸當
事與三節烈合葬稱節烈四婦云

君不見文文山作正氣歌津城節烈何其多父老向予說
三婦往往涕泗為滂沱二婦不受彊暴污秉貞浩氣還太
和一婦食貧甘苦茶冰心鐵骨玉為質不羨膏粱華腴珍
羞羅凡此稜稜不可屈堪比蘇卿持節牧羊坡三冢纍纍

一抔土丈二碑碣字不磨碧天霜月何皎潔羞照人間含
羞妖冶嬌翠娥聞風興起金氏婦夫歿無子奈少何照見
古井水不波泉路匪遙矢靡他里巷聞之各酸鼻莫不心
欽足頓手摩挲嗚呼從來烈節天所鑒公道在人相護呵
今茲四婦合爲一各行其志同香窩
聖世采風重節義表厥宅里樹婆娑豈無鬚眉愧柔骨高
風松柏同巍峩

送家如岡姪歸海寧

迢遞歸心急冥鴻振羽翰卻憐詩酒契倍覺別離難回望
關河迴前程驛路寬臨岐何所囑珍重雪霜寒
送遠三千里囊餘書一擔望雲君自切聽雁我何堪夜月
光逾冷江楓影半酣棹歌歸去好山水舊時諳

追和心穀伯兄賞菊詩原韻

有序

丙辰榜後竟日杜門心穀兄飲余淡宜書屋酒闌夜靜談
及丙申秋賞菊唱和諸詩因出見示其中名士騷人雜以
瞿曇羽士亦盛事也回憶其時余尚在襁褓閱今二十年
矣紅友鬪題白駒過隙由今追昔感慨係之謹依前韻聊
自抒懷
東籬佳色傲霜秋共想幽人韻獨悠雅集宜增高士傳殘
牋未掃惜花愁廿年仍此重陽節三徑曾誰信宿畱收拾
青燈燒蠟炬今宵對酒不能酬

曉出廣寧門望大房諸山

櫟聲靜天衢蚤起逐鳴雁嚴霜滑馬蹄漸喜晴旭旦出城
矚遐景村塢宿煙散西山青於螺一一排遠岸疎鐘度佛

屋密樹翳仙館層巒殘雪明仄岫凍雲斷薜蘿如可攀應
有幽禽喚道遙鞅轡停貯目愜馳玩

渡桑乾河

拱極城西水聲急千里一瀉竹箭直陡接銀河天上來中
途帶得泥沙色我來卻值寒冱時勁風謾謾吹征衣枯蘆
敗葦蕩已盡惟見點點寒鴉飛危橋亘空疑匹練立馬長
嘶不敢踐俯視頓教斗膽寒憑高更使雄心戰道逢偃僂
翁睂白顏如童告我渾河源歷歷辨始終翁言古昔大禹
隨山刊木日洪河支流多蕩滴灑河一股稱最雄橫貫西
北復南折桑乾山前草蕭瑟源可濫觴無泛溢歛然東下
勢若雲分作雙流遂難遏君馬來何緩行行歲將晚不見
夏秋初沖澗百川滿健魚南徙不敢畱瘦蛟跋扈騰中流

噲吟鞞鞞鐘鼓集然犀或見怪沈浮或云河伯會海若水
族忽赴蓬萊洲長隄千金非不固止敵馮夷一宵怒偶然
蟻穴失防維四野驚濤沒村路

聖帝詔策卹下民議疎議濬皆重臣不然腴田美廬盡漂
蕩此身早與魚鼈鼉鼉爲居鄰吁嗟乎人生何異海中沫
牛涔非小海非大我家今住孝義鄉咫尺渾河作襟帶窮
源溯委自古屬吾儒乘槎直指牛斗途非迂何時桃花水
高春樹綠任我凌風長嘯驚天吳

房山道上

草枯沙見磧馬過雪畱痕殘照明山縣寒雲護小村玉塘
應有米石竇尚如門欲就樵人宿巖深景易昏

丁家窪

高崖四面圍深谷如仰釜流水漱石根蜿蜒到蔬圃砌堦
積層冰清光耀鷺羽飲馬忽忽驚踏空仍在土飢鳥棲一
枝羨彼老樹古園林寒翠疎鱗次出檐宇闕寂塵慮空覓
句吟逾苦飄風動征衣孤村響砧杵

羊頭岡尋高尚書墓

寒岡淡無姿子立森瘦骨徘徊亂石閒疲馬鞍暫歇側聞
高尚書葬此山水窟流傳墨竹派遠繼湖州殉二米染雲
煙師承盡毫髮遺蹤四百年來者失津筏我循墓道行松
鬣猶蓬勃豐碑侵綠苔幸未近耕垡虎嘯動深谿悲風自
此發暝色何蒼茫吟心轉恍惚但讀西巖詩珠林照寒月
欲遊上方白帶諸山不果

久聞上方山矗立霄漢裏復聞東西峪僧有數千指圖經

曾臥遊未得造巖趾白雲空去來遊息羨鹿豕今晨山下
行積雪襯紅紫亂峯插芙蓉峭嶠眩高視塵蹤負夙願相
望隔墟里慚愧杜陵翁青鞋何日始

東安道上

一路寒風送馬蹄晚鐘斜日縣城西蒼茫僻路行人少敗
葉蕭蕭鳥亂啼

爲汪西顥徵君題花塢卜居圖冊子

臨安富川巖諸峯在肘腋湖上厭劇游西溪獨幽僻吾友
愛地偏結茆枕槃石誰家舊花塢于焉卜新宅春初百卉
競嘯詠忘役役泉汲清澗寒籬穿短筍碧我亦素心人每
蹈尋芳跡他日橫山堂與君接茵席

臘八日偕汪西顥徵君家天來姪飲水西莊之花

影菴分賦得十蒸

未肯潛藏類凍蠅卻無奔競有誰憎笑非天下功名士差
似人閒粥飯僧鑪火旋消茶竈冷月華初吐硯池冰何須
鐘鼓追鄰寺長此偷閒我最能

望海寺

殿角曠曠寒日明憑高迢遞見蓬瀛河分九派門前合潮
送三山檻外迎煙靄有時浮刹影霜天無際徹鐘聲回瞻
宸翰光華著長使波濤晝夜平

冬日偕高五雲汪西顥家天來重遊香林院分賦

得十三元

廊外別開門鴻都舊跡存殘牋猶挂壁危石自生根鶴唳
風聲勁烏啼樹影昏晚來隄上望寒月淨無痕

月夜自水西莊步至空亭舊址望西淀水閒積雪
夏日恆苦熱冬日恆苦寒寒惟不畏寒入骨當頭爲愛月
影團疎林蕭蕭閒蓬戶鄰火參差出牆堵夜春斷續人未
眠婦子時聞喧笑語行見空亭舊址荒草枯霜白似鹿場
侯門興廢古無常區區何足生悲傷隔河忽近無垢國琉
璃爲地添粉飾零星殘雪搖春光極目疑在廣寒側憶昨
秋霖漲溢時銀濤欲捲扶桑枝出浦漁舟驚海若鷗鷺竝
徙滄江涯疊浪堅冰轉眼異可知通塞尋常事自來耐冷
惟纖阿夜夜還擁冰輪至

祀竈

粵自燧人興取土中央燥旣以孟夏饗胡爲季冬醮殘臘
逼歲除禍福詎神造耨耨箕帚語直向昊天告雲車風馬

金鼓書堂遺稿卷一
行糖豆粉餌勞黃羊割以酬白雞殺以報邀飲及比鄰五
味雜傾倒宐同門井司酒漿播文誥俞子記可師魯望解
最妙

銅鼓書堂遺稿卷一終

男淳孫樞校刊

銅鼓書堂遺稿卷二

宛平 查禮 恂叔

丁巳

正月六日高五雲孝廉汪西顛徵君胡文錫秀才
家天來姪集味古廬對雪分賦得花字

曉看庭霰映窗紗豔雪爭春潤物華舊約仍穿三徑入早
梅初放一枝斜詩人不在功名列風味依然處士家來日
無妨同翦勝諸君誰更筆生花

人日水西莊小集

山蔬野蕨作春筵來趁西園雪後天吹到條風便駘蕩枕
溪廊外漾輕煙

送符幼魯主事歸錢塘

東風吹柳碧毵毵惜別樽前意那堪儘可吟情同硯北如
何帆影指江南梨花夜落三更雨桃塢春生百尺潭想到
西湖攜屐好亂峯深處筍抽簪

三月十七日汪西顥攜酒招同汪惇士胡文錫過
水西莊予不果往簡詩一絕

芳草如雲倦蝶魂春風幾度拂清樽愁腸百結花無語開
徧丁香未出門

送家天來姪歸仁和

雪後金湖水似雲羨君歸路惜離羣柳條送客情難盡桃
頰迎人色正醺酒罄餘歡翻寂寞詩添別思倍殷勤紫紵
碧草三千里兩岸鶯聲忍獨聞

謝趙功千徵君惠龍井茶

薰風南至白晝長驟炎天氣梅子黃小齋幽處鳥聲寂午
倦敲脚傲羲皇北窗一枕夢初覺煩渴思吸紅蕸漿恰好
封題來日下麥顆寄我翠筠筐開籬頓喜清香發藍英簇
簇含芬芳產自龍井信靈卉摘焙工細超尋常武林山川
割秀氣龍泓泉石標旗槍茶人飽食紫花脯茶鼎詎愁臯
盧荒我急爲滌甌犧具呼童汲泉手足忙松聲解眼文武
火法案經訣意周詳啜之一椀至七椀翛然兩腋生清涼
清溪頰石何足數品第顧渚差堪方漫說輕身與換骨還
憐破悶兼搜腸令人少眠始見真茗分五等此最彊感君
知予嗜茶癖不待致書貽頭綱何以報之夜旁皇吟興笑
減醉歌狂浣花牋帶珠蕾色遙將滋味共君嘗擬垂清塵
傲天壤薜以當酒今何妨

金堂書室遺集卷二
雨後同劉紫仙余元平汪西顥余犀若過水西莊
看荷分賦得暑字

溫風被長林結伴度芳渚西莊最清涼爽氣薄島嶼熒熒
芙蓉花出水燦如炬雨過無纖埃開軒滌煩暑猗彼婉孌
姿含芬動少女聊將醪醕酬何用桂棹舉浴鳥泛白鷗遊
魚戲魴鱖田田翠蓋閒鱗羽竝得所爲歡當及辰觴詠抒
情緒解衣笑嵇阮褫巾誚傖楚攜屐思東山圍棋賭別墅
興盡尚徘徊因花索解語

送侍讀徐魯南先生還宿遷

江東數耆舊落落晨星殘先生秉儒行舉世尊儒冠昔者
趨禁籞偉望標朝端簪筆比班馬摛文繼歐韓三千長牘
奏九萬高風搏龍池柳正綠螭陸霞初丹中年偶息駕衡

泌資盤桓三餘事搜討四庫儲締紉晴軒據梧讀牋襞盈
牀攤繩繩榕村學振委揚其瀾鶴書自
天至碩學徵甘盤前遊續玉府新渥陪 金鑿固知松柏
質益被雨露溥朝來念初服結想歸河干安車上苑出祖
帳東門觀豈曰豹隱霧實乃鴻漸磐西沽水清澈入海波
漫漫蒼葭聚淺渚碧柳圍清湍維舟得信宿雅好通金蘭
捧袂方告始離軫何遽彈嗟予志披謁夙昔銘腑肝吉光
一羽覩寶過青琅玕惜哉良會促未罄平生歡鍾吾雲繞
驛白洋浪捲灘興懷渺千里川塗鬱相蟠安得如澠酒時
時祝加餐

秋夜對月懷家天來姪在秦中

宵深涼露滴天末雁書稀詞客應添賦征人欲授衣蛩聲

當戶靜螢火入林微遠夢無拘束時隨落葉飛
懷人不可見況值萬山秋回憶同樽酒何堪獨夜愁名都
三輔舊逝水八川流未識因依處憑誰記壯遊

水西莊秋日雨中八首

西莊闢自信安灣竹筧茆檐屋數間習靜不驚風雨驟蓼
汀深處釣翁閒

雨趁涼颺透戶櫺重簾不捲晝冥冥焚香掃地無多事二
百籤餘小品經

村居幽趣許誰同不是詩人卽畫工一抹林巒描未得亂
雲如絮白濛濛

碧水迢迢漾淺沙幾叢修竹野人家最憐秋滿疎籬外帶
雨斜開扁豆花

拂隄衰柳濕拖煙漲溢長河浪拍天獨坐數帆臺上望羣
鷗飛過打魚船

幽人鼓吹聽蛙鳴紅板橋頭蟹市清何處疎鐘敲遠寺漫
催暝色寫溪聲

覓句何妨上小樓野籜歷歷雨初收夜愁夢入園西路一
港瀟瀟蘆荻秋

舟載寒煙乍有無披簑貫笠渺江湖輞川妙筆須誰借摩
詰如生必我俱

贈杭大宗編修

龍輔藏堅珉精英達山表駮駟生渥洼天閑待騰裏自古
宏雅儒奇光不終葆苟非明堂珍卽爲清廟寶君才萬夫
敵充實無虛矯美質含瑚璉清文飾黼藻蚤年事迹作肆

力志軒暉機杼由性靈規撫惡竊剽汲古功尤深筐篋任
傾倒豎義長城堅披源大河浩優游三十載藝圃秉麾纛
忽應褒書求觚稜日初曉遠辭薜蘿徑時視明光草螭均
長拜趨柱下恣蒐討三禮昔紛綸聚訟煩勘校君憑學識
超析微虛必擣明辨忌雷同純粹體直道鄭王與孔賈箋
詰窮杳渺壓角詣省初奪席衆儒小憶昨訪君盧輾輓走
行潦旋念水中央幽懷獨縈繞蘭蕙本同根芬芳無異抱
先路覬相攜周行殊了了倘肯分秋鐙來繙石經考君近著石

經考異一書
開雕日下

贈趙功千徵君

逸經古記辨無譌驟遣星輶出澗阿人擬趨朝旋釋褐自
甘補屋尚牽蘿青山乍老遊情減黃菊重開鄉思多籬下

不妨尋舊約與君一醉一高歌

丁字沽阻風寄周七峯

輕橈出煙浦開樽擘蟹臍扁郎喜無事瀏亮謳聲齊盲颺
忽西至號怒驅鳧鷖陰霾疊水面駭浪激危隄中誰鬪罔
象余欲明然犀潭深一篙短影側半帆低捎瀆與撇漩怪
語於誰稽嗟此尺水險何異復嶂迷泊岸日已夕聊復事
攀躋念我同心友咫尺通行蹊柴門遠剝啄蘭蕙盈秋畦
引領不相見擘紙寄幽棲

舟至津門口占

秋高風冷雁聲疎黃菊開時木落初燕市歸來無別物碎
琴價易滿船書

煙草聯句

煙草古所無事由後聖作托體冒稻梁山陰劉文起起岱占

圻塲稔纔三百逾錢唐汪瀨根已九州著萼濡露豈敷秀水萬光

泰循葉隕霜不落驕驕出畦塍宛平查禮恂鱗鱗臥林薄余塘

千箱載紫仙浦城交樞縛細疑金縷西顯片訝木枋削油兼

麻菽黏初循采雜丹黃錯精牯選質殊叔恂生熟儲材各製器

比佩觴仙紫懷鉛儼垂橐湘筠直幹標西顯越冶良金躍初看

呼吸通初循旋覺混沌鑿升煙陶安駭叔恂吐火偃師作霽霽

雲盪胸仙紫雰雰霧噴齟齬騰驚然頭西顯霏開倏刮膜銜枚

詎有征初循齧箭幾無鏐焚心任鬱攸叔恂炙手方焦爍磨兜

口緘似仙紫懿戒舌捫莫俗士學含毫西顯羣兒戲秉籥熱中

異皇皇初循苦口肖諤諤既勝咀檳榔叔恂寧須席糟粕名窮

郭璞注仙紫物窘張華博雷公乏炮方西顯炎帝空鞭藥昔未

登本草初循近乃延沙漠或幟樹交衢叔恂或價騰遼郭或少

長爭趨仙紫或主賓酬酢入門先茗薈西顯終筵後羹臠競誇

易牙調初循竝受丁娘索即次旅可巢叔恂覓句思可絡煖蒸

暑可追仙紫噤瘁寒可卻猶稱飽食賢西顯那慮獨處廓誠哉

習俗移初循殊嗜失渾醞我思神農來叔恂九穀濟民瘼疆因

稼穡啟仙紫土為耕耘拓苗於莠必鋤西顯葉惟桑可斫降種

悉由天初循此詎勝藜藿利等鹽鐵饒叔恂害如蝥賊惡腴壤

棄黍稌仙紫田峻乖刈穫備必自游民西顯饑難振溝壑作詩

肖虞箴敢云資嗑初循

丁巳閏重九招劉紫仙王孝先吳中林朱崙仲李仁山周月東余犀若胡佩康趙端人汪西顯施濟清萬循初心穀伯兄集秋白齋賞菊

少暉司秋辰伊耆定閏月積分既有常歲功乃無闕古人
 置閏當歲終義同履端於始居門中周人建子秦建亥後
 九月稱自祖龍顓頊歷以十月為歲首凡閏月皆在行夏
 之時卯金起古歷重頒太初始閏九之月推三年偶一相
 逢常踰紀今年秋季去復來涼飈瀟灑黃金臺無射聲高
 金德盛登高頻鼓安仁興昨宵月上弦中氣秋冬偏開我
 秋白齋繞屋羅嬋娟十分秋色勝春色幾家愛菊勝愛蓮
 蓮逢閏六月一落不再妍菊逢閏九月顏色尤新鮮麗采
 繽紛香絡繹對此儘可娛朝夕君不見宛轉旣緣階踟躕
 復照席或肖蒸栗黃或擬丹砂赤或雜翠羽青或攢鶴翎
 白或漬燕支紫或映湘竹碧或內植如主或外環若客或
 丰茸若毳或纖細若畫或踞高若傲或俛避若迫或猗靡

若隨或夾輔若掖奇情異態千種萬類夭矯不可狀恍如
 入七寶之欄錦絲之障仙影迷離霓裳飄颺試問陶氏東
 籬陸家甫里幾見天工人巧一一別自靈根花中有洋菊數百本
 自昔黃花最耐久今秋更益黃花壽萱草參差映北堂卻
 教重獻南山酒家生母設悅在重陽節今酒自餘杭勝蘭
 陵花來酈縣含芳馨每逢一閏一甲子菊花卽是弧南星
 況復名賢不常遇幽齋合慶朋簪聚舊友曾停戶外車新
 知又滿筵前履燕歌吳詠盡雄文少長咸推大雅羣吟懷
 直欲凌千古勁敵於茲張一軍清談旣足聆何必絲與竹
 寒英旣可餐何必金與玉氣靡沈謝輕曹劉咳唾莫不成
 琳球文字之交拔其尤雅逢知己抵封侯萍葉無定蹤蓬
 根無定所山川自古今天地原逆旅此日銜杯花月前他

時花月又誰憐雪泥鴻爪空陳跡渭樹江雲盡渺然君不見
天花風鐸延清賦剎鳳蟠龍巨山句當年佳節愛閨九
各鏤文心托雅素唐宋之間李嶠有和中宗閨九事已千秋斜陽古寺夢悠悠誰復黃花慰遲暮惟餘文采
垂風流敢云俊秀抗同儔獨慚康樂夫何憂

送朱稼翁上舍歸秀水

九月清霜肅千林秋氣高歸帆隨雁序解佩惜江臯有分
攀征袂無緣罄濁醪臨流一悵望離思颯蕭騷

黃花店書懷

有序

余今歲植菊千百本於秋白齋適逢閨九與同人倡酬花
下興倍淋漓至樂也忽有榆堡之行次桃花口之西北有
村名黃花店土風醇樸景物蕭疎村之中有一古閣飛棟

層檐足供遠眺雖店實無花而村名頗雅且不無佳境可
憑卽從閣主人索得殘紙敗筆率爾成章聊以寄余懷菊
之意云爾

秋花本閒淡意與靜者宜晨夕愜素心不知秋去時無端
花主人秋去人亦離一從別花後驅車薄層颺丹楓醉巖
霜白榆搖枯枝所遇非故物短景看西馳行行見墟落炊
煙動茆茨居人胥淡泊古樸鮮容儀駐問桃花口徒滋搖
落悲乃聞山店名停車一訪之惜哉黃花店孤負舊霜籬
如何老耕垆而忘五柳師懷芳感宿念玩景興遐思飛閣
攀巍峩極目天無涯回首憶津門日暮孤雲垂臨風想我
友宛在水之湄人生無羽翼飛蓬悵空隨竊恐秋時花還
同百草萎

秋暮野望同王孝先

結想渺無端尋詩隨所至策蹇趁秋杪踏徧白沙地夕陽
落遠山清磬出幽寺寒雲壓長林喬木託深契自覺俯仰
寬誰知遊者意

榆堡雜詩四首有序

榆堡在畿南八十里祖墓在焉有宅一區凡春秋展謁必
棲止數日今年履方仲兄以真州通守叨膺

綸命因及秋祀焚黃於墓謹賦四絕以紀其事

龍章新捧自天來競整衣冠拜草萊一命叨榮皆祖德承

先敢說子孫才

馬鬣封前秋祀虔山肴土蕝亦成筵村娃野叟誇珍饗蓬

鬢繩腰繞墓田

秋來潦水沒平田陸地從教舟濟川填得黎陽新樣土宵
隨鶯鴨鬧牛眠

百果凌秋結磊砢就中酸棗北方多南朝樂府誰須繼試
聽纂纂花下歌

寄懷香雨廬諸同好

吾家孝義鄉民風素沕穆考宗自高曾百年聚國族一從
徙漂榆塵坳苦馳逐茲晨旋柴車日轡轉北陸墓田肅祀
事既享騁遐矚霜明隔岸葉煙暗前村屋清襟得披豁離
思忽相觸念我同心侶鍵關對殘菊笑言十日違停雲悵
極目蕭蕭北風涼能不悲落木

有懷堂冬夜聯句

深夜荒村集查爲仁相看豈偶然津河勞跋涉李授山社保

足流連瞻拜沙城近王本追隨棣萼聯

王綸宣鳳翥查禮叔丙舍協牛眠為趁澆松日心穀同吟擊鉢

篇鑪圍通軟語山仁跌坐學安禪吠犬巡深巷先孝飛鴻下遠

川月迷殘雪徑叔恂人戀小春天心影空愁畔穀心燈花落酒

邊更長人易倦山仁境靜地尤偏垂幕浮銀杓先孝分曹擘錦

箋寒英餐紫菊叔恂香稻煮紅蓮飮座金橙嫩穀心登槃玉膾

鮮言如蘭馥郁山仁夢逐蝶聯翩白首期來日先孝黃梁悟早

年功名煩竹帛叔恂聚散感風煙喬木春秋古穀心光華甲子

遷良辰須鄭重山仁素侶愜周旋漸覺雞催曙先孝渾忘霜折

綿何時謝塵網叔恂於此跨烏犍穀心

同李仁山王孝先兄心穀野香居沽飲次仁山韻

捲席成檐屋似巢高懸青旆出林梢杖頭錢坼新泥甕瓢

裏詩憎舊繫匏漁弟樵兄皆酒伴溪毛山蕪盡珍肴野香

須待梅花放醉覺荒村便樂郊

榆堡夜坐同心穀兄作

寒光如水撲檐楹無際霜霄一雁鳴窗靜正宜延月色林

疎不復礙鐘聲荒村兼味雞同黍深夜聯吟弟與兄最愛

閒居城市遠夢回免得數巖更

南莊道中

落日寒無色晴煙暮轉蒼野田惟剩雪木葉有餘黃馬逸

嘶風健鴉昏掠水忙征人歸思迫迢遞過南莊

夜宿聞思寺

暝色上林端征途息塵馭歸禽聲嘈嘈磬響梵音度言尋

田墅宿翻與紺園遇庭空淨五蘊殿古依雙樹徐看佛火

明篆煙裊香炷疎風透禪關冷然得佳趣夙昔愛清淨棲
心在貞素結宇青蓮池於茲證妙悟

雪後遲心穀伯兄不至同人以畱伴疎梅小雪天
爲韻分賦得伴字

旭日抱扶桑寒光耀震旦深林宿靄微遠浦浮煙散玉積
山已頽瓊飄戶猶燦音聞屐齒頻可無索居歎離懷逼鳳
城相思渺河漢昨夜雪深時孤燈更誰伴朝來數引領征
鴻連復斷遙知輾轉途旁午冰初渙踟蹰馬足煩輾轉車
聲漫羣賢集已久鑪冷索獸炭行人不果來詩酒分杯案
吟罷尚徘徊獨向門前看殷殷兄弟情豈特在毫翰

城南水泛歌

陸行利用車水行利用舟各適其用利其利帆檣牛馬不

相謀朔風一夜關南至河水吹高等平地處處牽船岸上
居家家盡法張融智漂榆城南寒月明石田萬頃何晶瑩
浮光倒射天影白七十二沽無水聲舟師漁師竝穎悟伐
木丁丁作牀渡非扁非舫淺不浮以冰爲陸輕畀步歷坦
旣絕風波慮乘堅且似推殷輅獨行可學敲脚眠竝坐何
妨交臂遇綠蟻時已筭招我同心儔緩步出城關共作南
郊遊冰牀鹿鹿艤湖側凌風臥看玻璃色疾發羣驚鐵箭
飛往來更似金梭織須臾忽近招提境樓閣岩巖妙思騁
怪我初從鮫室來滿身猶帶珠光冷觥籌雜遝催談笑聲
喧豗不知銀漢淺惟見玉山頽八蜡祠前擊社鼓聳身直
入清虛府翻喜今年臘日長不須早喚春風舞暮訝輕雷
鳴澗壑霜星搖動銀花落侍晨執蓋影參差仙佐馮夷奏

嘉樂無辭秉燭極歡娛醉卻寒威抵萬夫歸時更踏堅冰
去記取城南舊酒壚

香雨廬獨坐

幽情遠物情不與利名爭籤軸詩書亂甌犧風日晴身將
梅共瘦思與雪俱清茶罷耽吟久鑪煙一縷生

戊午

正月四日吳中林司馬李仁山上舍汪西顥徵君
萬循初孝廉集香雨廬飲梅花下分韻得斜字

谷風來習習迎春扇物華小廬過微雨幽香動寒葩日高
弄疎影潑墨上窗紗淨如點白雪紅或碎丹霞羨此勁秀
質真成玉樹花羣賢重淡交不爭凡豔奢花旣無纖塵人
亦無纖瑕翻嫌詩酒伴遠傲山人家孤峯削鳥喙怪石壓

蝦蟆點綴本天然尚欠竹陰遮欲窺清淺意待徙水之涯
佇看春燈逼新月已西斜

上元同吳中林汪西顥萬循初過水西莊登數帆

臺觀雪分韻得雪字

春城夜夜笙歌徹萬戶春燈燭天熱佇看銀海展金輪共
道傳柑好時節五更忽訝布同雲狂肆獰飈尤惡劣冰花
散亂壓樓臺旋報街衢沒行轍曉騎款段出城西四蹄往
往愁跛蹙衝寒直過水西莊數帆臺上景奇絕連村樹樹
著梅花棲鳥不飛啄瓊屑同人縮頸呼酒急笑指青帘凍
如鐵撥甕新醅色頗清春初早韭香尤潔嗜慾心從無垢
折須臾觴詠胸襟別就中惟我意最拙思將紅日烘巖穴
僵毫安得遽生花呵硯頻磨烏玉玦吟到迴風句始驚衰

底乍恐春光泄欲待秉燭興已極排空雁字聲幽咽歸去
圍鑪任醉醒劇談休管燈明滅晴時更約數帆來蠟屐何
妨踏殘雪

寄懷鮑千仞

風和徑生草溪綠水無波春城隔煙霧相思悵如何憶昨
衝寒來皓髮顏微酡相期采藥去歸趁明月多此意非不
佳青山近可過從君棄筆硯腰鏟入巖阿

花朝前五日招吳中林李仁山汪西顥萬循初過

水西莊小酌各賦五絕

梅子纔生柳散條辛夷未放草如袍濃煙細雨無多日又
見東風破小桃
也將數畝種桑麻結得茆菴近水涯不學河南張貢舉手

持貝葉念曇花

閒情覺比宦情濃局外參觀勝局中鴉背夕陽畱不住祇
餘一抹斷霞紅
筍鞋踏破鷺汀煙夾岸桃花繫釣船若得春光終不老何
妨於此共忘年
幽情如夢預難期來日空勞去日思惟有吟詩兼酌酒花
朝月夕盡良時

題汪西顥對牀風雨讀書圖

潑墨漲溪煙秋氣寒林木風雨掩柴關何須客看竹叢書
塞座隅芸籤散芬馥遠擬鄴侯家插架三萬軸兄弟自相
師討論絲信宿不爭徐孺謁競效陸倕讀連枝忽偏隕逝
者不可復披圖感棣華回首義輪蹙長枕事已非池塘夢

誰續慨此三重茆彷彿東西屋

上巳同劉紫仙吳中林趙端人汪西顥萬循初胡

文錫登稽古寺藏經閣晚過水西莊飲攬翠軒

清風徐來遲日妍絳桃初發花欲然城西草色綠如翦迷
離遮斷陌與阡一抹青煙繡平野超塵域近同駐馬雜樹
蒙茸積翠陰慈雲朵朵垂檐下傑閣巍峩碧漢高俛窺萬
戶明秋毫鈴聲滿耳衆籟寂市近未覺人喧嘈梵宇重重
耀白日莊嚴百寶魚鱗密世界憑誰悟大千吾徒數備竹
林七粵稽白馬止鴻臚寺名從此屬浮屠度人何止鹿羊
車圓通自有智慧珠水西另闢清幽境賓從往往轄投井
酒中仙惡醉逃禪長齋之客緣未請當筵又見日西斜分
杯插羽飛流霞興酣各趁婆娑舞聽我長歌且無譁君不

見河水金人爭掌故蘭亭遺蹟空山路往事多聞虞哲爭
盛名只有孫王序何如痛飲青絲瓶高談兀傲傾平生燭
花如豆當花照未許城門報一更

惲哲長縣丞畱飲平臺

斜陽明曲牖把袂忽登臺塵市參差出林巒次第開孤雲
隨鳥去朗月照餘杯更喜簫聲徹眞疑天半迴

如意船歌

生不願入海求神仙海風引船船欲顛亦不願從軍事楊
僕萬斛樓船渺如粟吾愛此舟樸且輕一葦靜泛滄波平
短帆十幅隨舒卷風止亦止行亦行木蘭橈沙棠槳牙爲
檣錦列榜不及吾家書畫舫日夕乘潮穩如掌蘋花疎疎
蘆葉長獨把魚竿任來往

薄暮舟泊潞河州城下偕循初買小艇尋天橋灣
不得乘月而歸

聞說天橋景最幽荷花深處正初秋興來買得瓜皮艇前
指迷津狎海鷗

欲尋銷夏別無灣登岸微窺露遠山滿地月華流似水石
塘高枕聽潺湲

謝王廣心侍御惠湘蓮

攜從驄馬使出自楚江濱百室盤旋處中心甘苦均湘靈
香淚染漢女珮珠勻清絕官齋意多君氣味親

百草溝上望田盤山

積雨秋深滿車轍行行迴與鳳城別山靈不許畱纖塵示
我青山淨如刷周遭馬首相迴環秀色峻嶒儼可擷疊嶂

層巒在襟袂夕照移情傍巒嶂掀眉細望十五峯僂指數
之一無闕星羅碁布分高卑蠖屈龍伸互凹凸端如正士
垂冠紳靜如飛仙歷冰雪遠如衆鳥翔蒼霄繇如甘瓜衍
繁飈朗朗忽聽巨鐘鳴百里青煙共蟠結一時七十二禪
關暗制毒龍妄念絕道逢野叟問遺風此地誰稱古時傑
羣言隱士古頗多惟漢田疇名不滅漢庭鼎沸失關河青
冀幽燕交僭竊田公一生忠義士高隱無終懷激烈報讎
不受魯連功奉使無羞蘇武節嗟哉斯人已不作千古徒
令肝膽熱苟非浩氣鍾此山那得高風冠英烈我來擬卜
山下居短短新茆候時截開軒蒼翠撲檐楹嘉樹蒙茸足
怡悅青鞋布襪事非難長向茲山養疎拙

松雲硯歌

問松何從生生自蒼崖怪石閒爲君作梁棟廣廈相周環
問雲何從起起自層巖窮岫裏爲君作甘霖沛澤彌遠邇
嗟爾硯石惟一卷硜硜有聲質頗堅窗明几淨取適用何
事下松上雲煩雕鑄閒來拂拭思其義輾轉摩挲愈青翠
想如几杖銘微言卽松卽雲寓深意君不見世人作文趨
紛華濡毫學染三春花惟松後凋守嚴正足以壽世無夭
邪世人作字競方幅左右拘牽同桎梏惟雲無心任去畱
可諭優游資化育又不見石本孤雲根噓拂成青雲雲散
有時盡石老千春存若彼松風石佳名垂在昔時供染松
煙遠勝藍田璧我今得此二妙俱無用岱岳尋枯株恍見
封中態卷舒咫尺掩映春模糊臨池洗妙墨影活龍蛇黑
其驚草聖奇傳觀不得息操觚各各紆長歌松聲雲氣成

煙波犀紋鶴眼今已少松兮雲兮奈爾何

題硯北勘書圖爲家七倫兄

桐樹陰陰垂翠幄日光斜轉珠闌角臨流獨坐手攤書玉
軸牙籤燦斑駁露華滴硯清如珠支頤不語頻操觚有時
撫卷行起舞搔首欲向前賢呼兄家南海濱咫尺三山樹
弟家北海傍迢遙九河路相逢京洛羣稱奇蔚然如對青
瑤枝同流異派源豈遠依依棣萼長追隨懷才自合乘時
起何堪久住深山裏石渠天祿祕書多甲乙丹黃從此始

榜後余荆帆以詩見慰依韻和荅

傲霜惟有菊精神一度看花一曲新月裏仍畱青桂樹堂
前未慰白頭人頻年卻喜詩添友壯日空期祿養親子道
須兼臣道盡患貧庶到貴能貧

寄杭大宗

沾水人如舊東籬菊自深榮枯俱是夢得失不關心風急
秋光老霜寒夜氣沈細思憑遠雁吟就寄遙岑

哭王廣心侍御

璞抱連城值出自荆山巔舉世誰不寶質古色愈鮮嗟余
相見晚握手心拳拳真純非貌敬言動無尤愆允堪消鄙
吝朗然竝前賢無端忽隕逝幽陰閉重泉有識盡同悲良
非故周旋臨風頻灑淚雲山悵延綿

方鏡十韻

誰折瓊臺片周遭一尺天高眠妝閣畔卓立綺樓前負處
真如局磨來尚似輒重帷遮不盡圭竇映無偏忽訝晶簾
落翻殊碧月懸清輝剛滿匣直道擬張絃弗學摸稜相應

羞宛轉緣奇光畱匹練妙算得方田紙帳疑形似銀屏蓄
影連街頭如聽卜四角望車旋

送吳中林卽次畱別韻

何必重增求友聲兩年伐木聽鳴鶯每傾腹筭徵源委如
飲醇醪見性情燈火三冬寒透骨朔風一夜雪盈城征途
覓句無人和自整吟鞭按轡行

以吳綾贈杭大宗有詩見寄次韻奉荅

海津風土異江左原田每每無桑麻道傍豈少棗與栗橫
枝直榦空槎柯輪囷百貨仰南國築城適際河三义帆檣
成林客騁驚日暮還聽吳音諱卻笑北人異嗜好如屏膾
炙探瘡痂輕羅細縠非素蓄搜求往往同披沙昨趁和風
動阡陌南轅喜返故人車攜贈無多止數匹清絲密理質

頗嘉不比織成錦褥段中有鯨尾掉浪花我未卷還爲君
割劇慚樸素非繁華兩心和平詎厚貺報我反愧瓊瑤加
爲言一百九十六再三熟讀忘其他一縑一字古所貴遺
者何儉酬者奢同聲聊復申綵繡敢云鬪險競相誇
歲暮張少儀徵君過味古廬飲梅花下用岑嘉州
喜華陰王少府使到南池宴集韻
爲待江南客因移薊北梅疎枝侵臘破佳士挾春來細翦
朦朧燭頻傾澹灩杯東皇開獻歲還約醉千回

男淳孫樞校刊

銅鼓書堂遺藁卷二終

銅鼓書堂遺藁卷三

宛平 查禮 恂叔

己未

元日懷海寧家七倫兄用家德尹伯戊戌元日枕
上詩成寄初白嶺南次章韻

元日風光暝閒吟忽憶兄家庭分長幼兒女喜同行梓北
橋南路花前雁後情何時重把臂樽酒得頻傾

懷吳中林

幽思涵芳蘭生意滋枯柳林端好鳥鳴天涯憶吳叟論道
望及肩談經慨白首文史足三冬又歷傳柑候殘雪妬早
梅圓月勸杯酒良會在知心何當別離久

人日過周月東卜硯山房觀鄭簠八分小篆冊子

用杜少陵李潮八分小篆歌韻

春莫初報布七葉春冰漸薄如秋雲盡說今年春暖早疎
梅已放香三分呼朋共走卜硯宅主人好古徵博聞叢聚
蟲書似蝌蚪眼明履本畱其真就中篆隸擅造化夜應泣
鬼晝駭神開函已識谷口筆徐觀愈覺心魂親想當揮灑
日特立無與鄰風流既往不復得至今縑帛思其人近來
嗜好多皮相燕瘦環肥異趨向莫如吾友衡鑒精是否加
之項誰強直沽水黑孰竝肩朱大導江墨蹟壯二子風力
咸豪宕與鄭誠堪稱輩行斜陽忽在戶飲酒還高歌歌成
聊復就君問問我詩中意如何

蒼葛搢書馮敘九張少儀陳以舟見過水西莊之
作

水西晴雪照千塍村墅風多未試燈梅怯餘寒剛破萼沼
憐輕暖漸融冰徵歌那得梁閒繞待月還看樹杪升誰信
嘉賓翻作主深情如酒醞難勝

荅搢書少儀水西莊聽歌三首

鷓絃鐵撥唱涼州寂寞人閒李近樓今日地衣紅皺處阿
誰一串似珠喉

宵分鸚鵡舞凌兢三寸瓊鉤一束綾多謝東風好擡舉菱
花吹上最高層

聽到樓臺鶯囀時雜花滿徑柳縑絲樊川定有傷心句更
遣新聲譜竹枝

春日同余荆帆汪西顥胡文錫遊牛氏南溪分賦
得林字

金華書屋遺集卷三
二
雲薄釀春陰名園近易尋水禽鳴有族野客坐無心溪淨
浮罍影牆低度梵音小橋時獨立殘照入深林

和萬循初楊村對月見懷原韻

歷歷雁拂雲泠泠魚吹岸雪消晴色融風暖春水泮懷人
動遐思長嘯撫琴嘆花夕然村煙漁燈暗河畔俯仰清境
殊星影稀霄漢把酒起徘徊冰輪缺已半

題文衡山枯木竹石軸子

有石瘦而獐有木疎而爽木德誠支離石態亦骯髒列竹
遮其旁欲作風雨響節節金鐵堅有直無曲枉衡山手通
神一筆含萬象命意咫尺閒取勢在尋丈自云比東坡今
昔誰下上倘爲賈收贈後必獲奇賞兼之對此君日夕資
俯仰枯中生趣多慎勿譏崛強

正月晦日余荆帆汪西顥胡文錫集飲水西別業
有懷趙端人萬敬懷循初兄弟在都卽席分賦得

十四鹽

西莊尋禊事把酒坐沙尖雁過晴雲斷潮來春水添曝書
香滿砌放竹綠侵簾遙憶京華客離懷此日兼

贈余荆帆

簾垂晴色鳥聲融幾載湖山夢越中浣浦江雲帆影白苧
蘿村雨杏花紅釣絲空繫微茫月鄉信虛傳斷續鴻靜裏
長吟詩律細謝公清興有誰同

掃地焚香夕復晨楓溪舊是一閒身世從涉後心逾淡形
到忘時誼倍眞外館無魚慚作主小亭有鶴解畱賓莫辭
滿酌麻姑酒二月津橋柳正新

得高五雲都下書

美人隔秋水三年斷飛鴻相思對古月笑語何時同陽和
布芳澤百草搖春風忽馳尺素書寄我津河東開緘猶把
臂宛轉心神通青門在密邇咫尺蓬萊宮驅車莫晚晚早
慰怒如衷

香河縣

未渡扳唇口孤村入舊途沙深埋馬足風峭割人膚秃樹
啼烏鵲荒郊走白狐何年鐵佛臂寂寞鎖浮圖

百家灣

在香河縣北其水無源四時不竭長安客
話云有居人百家淪沒於此風雨昏晦尚

聞雞犬
之聲

一灣春水與隄平潭底龍堂剩幾楹客話長安風雨夜誰
聞犬吠又雞鳴

三河縣

匹馬隨芳草巖城綠樹環南橋俯洵水北郭倚靈山嗚咽
春笳亂崎嶇古道艱相逢多旅客誰似白雲閒

百草溝

空堂卻喜俯郊坳雨後苔痕滿戶庭草色乍回前度綠山
光已露上盤青蔥蔥短樹春來植恰恰流鶯夢裏聽自笑
看雲閒不得溝邊擬築小茆亭

過固縣里訪尤孟仁

振策薊門西平沙濕煙霧言尋固縣里徧歷環山路騁目
得喬林白楊臨水布云是高人廬三年此哀慕入門茆屋
低四壁堆竹素掃地可敷襟促膝喜共語感君道氣深使
我鄙吝去余家百草溝新種青松樹望隔一牛鳴相過百

餘步春風鼓晴和柳色迷溪渡欲別屢遲回斜陽展孤墓
何妨日往來習靜幽棲處

馬上望塞北諸山

好詩多爲看山成今日閒吟馬上行北望羣峯青歷歷一
峯陰又一峯晴

平谷縣

路入無終國盤陰草色齊疇平孤縣小日午四山低花好
尋遺阜泉甘覓舊溪行人頻駐馬煙外聽長嘶

紫丁香花歌爲杭大宗編修賦

春陽作暄花事穠萬卉爭光鬪嬌嫵媽紅姹紫紛陸離如
火如荼塞亭圃就中丁香尤麗都李俗桃輕迴難伍我家
結廬城南鄉曠者宐田奧宐宇茲花開日春正妍不惜樽

疊醉簫鼓今年春作城中遊軋軋雙輪碾塵土臨風怙悵
歸去遲竊恐飛英落如雨松吹先生我故人庭有名花恰
當戶登堂靜對娟娟容彷彿南鄉花乍吐高枝似裊紫玉
煙低影還如紫雲舞柔肌纖骨不勝扶細眼明眸疑欲語
蒙昔亂蘂笑紫荆更比紫薇重難舉羨君深院金屋同貯
此娉婷十三女看花有客昨朝來聞道吟聲滿環堵惜哉
良會小差池未及花前倒清醕繁華盡逐風波流已去韶
光喚誰補先生高致超尋常一室從容考今古晨昏坐臥
清香生身與名花合稱主此花自昔少畱題喜見詩成羣
玉府牀頭如輯種樹書應採瑤章入花譜

送萬循初歸秀水

津橋送遠客把酒酌鸚螺一夕分襟處三年共嘯歌離亭

新雁少歸路舊山多料得抽帆日南湖水似羅

屋南小築落成

城市異山林日有車馬跡誅茆結構成聊以娛晨夕開軒
避塵囂置戶傍林隙所貴樸素材不尚丹與碧晴煙時遠
近好風還絡繹佇看雲無心胡然為形役

贈田在田助教

前輩音徽散似雲別裁偽體阿誰分巋然尚有靈光在濟
水才名獨數君

嘯傲林泉願已償白頭仰屋著書忙田何老去蕭騷甚海
鶴丰姿六十彊

山薑花發雨絲絲畫省郎官退食遲日下至今傳盛事移
居和徧矻綾詞謂司農舊事

悟出無絃指上聲瓣香祇合拜新城論詩七字真超絕雨

雪空山萬籟清獨立空山雨雪中先生論詩句也

八體摘文迥出羣硯思清韻舊誰聞何時潑墨晴窗下看

寫羊欣白練裙硯思齋集有論書絕句三十首

竹翠梅黃五月天昨來載得米家船卻教舊雨聯新雨共
話平陵七十泉

五月十日茗槎坐雨同汪西顥陳江阜心穀伯兄
分賦得一東

連朝梅雨濕溟濛曉倚疎窗畫舫同鏡裏雲巒高下處水
邊煙柳有無中眠鷗靜聽流泉響低燕斜翻卷幙風坐客
漫歌欵乃曲滄洲清興渺難窮

送田在田歸德州

方山邛杖叟物外自忘年篋守司農硯書傳西圃編君祖公授硯一枚因硯思離筵酣白雨歸艇破青煙何日還攜酒重名其集曰硯思觴麥浪天

履方仲兄四十初度

壯歲光陰似擲梭問兄離思近如何親饒白髮能彊飯政在清時且放歌瓜字洲邊歸夢遠茱萸灣外夜涼多海門一水同秋色誰共移樽賞碧荷

送張少儀鴻勳李開地程軼青還吳門

離筵別酒太念念秋色平分遠近同沽水雁來蘆正白吳江人去豆初紅物情共覺浮雲淡詞賦爭誇斫地雄後夜相思何處最小樓明月一襟風

過李向叔齋中

露白桐陰碧張琴坐石牀晚餐無二味古墨有千行趣自安閒足言因欲辨忘歡然樽酒罷長嘯倚斜陽

九日登午晴樓

城南秋色與闌齊四望晴無宿靄迷半畝菊開花影瘦重簷風度雁聲低交頭杖喜高堂健九醞漿空滿尊攜同是年年憑眺日今朝獨上小丹梯

送家貢木先生還海寧

葛藟庇同根沆瀣通一氣族姓古所敦師承昔所貴二者况合并尊親道兼備吾師繩祖武風雅遠未墜賜書充棟梁晨夕勘同異煌煌披述作太璞振奇麗慷慨為歌詩醞藉皇古意憶昔來直沽余歲猶童穉懷鉛受誨言捧經問疑義幾度裘葛更不為風雨置一別阻關河慕想日翹企

今來喜欲狂驚此日月逝深情出肺肝快語傾篋笥秋高
菊正黃凜烈寒吹至端擬坐長宵勤勤問難字何事遄歸
心迅發難再制人生憑造物升降隨位勢奈將經綸手遠
置閒散地迢遙江以南山水詎衡泌如聞鶴唳聲頓結蓴
鱸思唱和松陵人遠勝玉局吏月憐吳苑明酒向楓林醉
余思負笈從親老志難遂惟當早梅開殷殷望驛使

送趙端人孝廉歸錢塘

離人如岸樹葉葉逐風疎君自多同調吾應歎索居相思
憑夜月通問有河魚春草來年綠尋蹤庶慰余

送汪西顥徵君歸錢塘

憶昔相逢鳳城裏雪花如掌空中團銅街紫衢凍車轍翔
風迴舞侵肌寒意外喜得覲君面和氣如春眼界寬旋嗟

良會不終日我馬仰首千蒼巒枯林積素萬籟寂翠屏削
玉皚嶙岼急整歸鞭歲云暮有約君亦促征鞍人生作合
固萍水無如臭味同荃蘭謳吟每共徹丙夜搜討更與忘
晨餐韶華一瞬嘆逝川候雁三振南飛翰旅人忽興懷土
念破曉買棹津河干顧謂主人此小別休悲絲竹煩吹彈
主人奈殊遊子意臨風不覺使心酸君家西冷煙水闊聞
雲來往棲簷端短短梅花香繞屋臘底春初應飽觀看梅
須憶鳳城雪雪夜翦燭燭淚乾

送趙北野先生還諸暨

玉繩指孟冬征途寒氣肅我師久懷歸晴帆挂十幅摳衣
走河干蕭蕭響林木恨無南來風回波轉去舳越樹隔江
雲遠遮千里目遙知五洩山黃葉深埋屋

寄樂兼思平谷

挂月峯邊客淹留老歲華打窗松子落拂檻茗煙斜清韻
流寒澗孤懷抱晚霞相思紅樹隔望斷海天涯

雪後陳汝咨觀察招飲恆齋賦謝

風吹雪花綴枯木南雁聲寒樽酒綠酒酣四座交清言瓊
雪霏霏勝絲竹妙墨連牀發古香筆花更有崔徐裝是日觀退
田設色櫻桃短幅流觀苦恨斜日短欲別未別心徬徨馬
蕭蕭鳴未已車碌碌無定軌歸來幽夢疑千里何時重醉
玉梅邊紅燈卻月搖青煙

食沙雞

塞外有異鳥其色黃而鶩謂從沙土出色亦如沙然非鶩
非鶩更非鴨形似山雞體似鴿有足三趾背毛拳有尾岐

若雙莖插人言此是突厥爵性憨不共凡爵躍知雄守雌
於道宜眾雄雖猛莫敢先雌馳張羅控弦呼鷹走健兒飛
伏難逃誰復論雄雌客自遠方為我贈故知載燔載炙以
佐鹿腸免首牛尾狸在昔周公著爾雅寇雉名居釋禽下
世無善讀爾雅人茲味雖佳知者寡人生嗜欲與歲新豹
胎鳳肺亦擬充常珍寧知異味美即疾食郎何必猩猩脣
此鳥雖奇幸無毒煖氣蒸騰補中腹重簾晝捲鑪火溫那
畏嚴寒利如鏃聞道塞門雲氣陰陰山臘雪今年深陰山
深雪如堵沙雞來賤似土

庚申正月至八月

早春讀書味古廬梅花下有序

去年秋自江淮閒得老梅三十餘株悉位置於味古廬下

春來作花頗繁更於窗壁閒徧黏畫梅名筆數十幅又雜以古今梅花佳詩賦數十篇日吟哦坐臥其下覺我身心與梅無二而香氣襲人惟古書奧味足以敵之

高低相映燈前月紅白爭春雪裏枝來處未煩江左驛開時勝寄隴頭詩壁添健筆摹清影坐擘新箋續古詞誰似劔南同此癖一翁一樹有餘思

春夜曲和心穀伯兄

凝香不散重簾靜簾外縱橫聚花影薄寒猶解翦紅衣一曲珊瑚鈎正冷隔院微聞絃索鳴嘈嘈切切遠含情美人自學翻新調不作當時子夜聲光陰荏苒如飛電海水東流無日轉遵渚初傳歸塞鴻雕梁又欲棲吳燕棲吳燕春將晚庭下殘紅吹漸滿秉燭狂遊惜歲華露華浸透羅衫

短何處清歌聲未已蓮花杓小傾芳醴更籌幾換啼鳥起月落西南淡如水

元夕寄懷汪西顥錢塘

東風卷朝寒殘雪猶在地雜遝會燈期年年此時意疊鼓聲繁燈火明家家醇酒如泉傾近水樓高試一憑月光似晝燭春城回思索笑語舊有樽前侶幾載結綢繆今宵曠鱗羽遙想金湖興正濃四山晴入畫船紅聽歌看舞清波沸酒半酣時月未中湖草青湖水綠何日北來雙槳速與君重話上元燈再向西窗翦華燭

燈夜招葛搢書過舍南小築不果來貽詩一首次韻奉荅

最速是光陰回頭無處尋閒遊宜此夜尺素約同心坐久

燈花落愆期望眼深空教簾外月寂寞度疎林

牛仲詩大令叔易司馬兄弟招隨家君同遊南溪
奉杖尋遊春正融南溪水解小舟通橋邊聚影毛魚動沙
際含煙宿雁空吟約遲歸燈代月醉扶弱態柳當風同人
記取城東路芳草迷時興未窮

謝沈畹叔編修惠舊揭禊帖帖係家宮詹仲偉兄
故物

當階轉花影天末層雲舒故人侍直暇遠寄雙鯉魚魚中
何所有不僅加餐書贈我永和帖價敵千璠璣上鈐淡遠
印歷歷鈎丹硃我聞蘭亭本肥瘦常分途一百十七種在
宋已各殊况復數百年輾轉多精麤縱有最善刻豈少榛
與蕪此本極清澈毫髮無模糊稀疎秋蟬翼淡墨層層敷

宛如清泠淵洗出明月珠又如銀塘水初透紅芙蓉吾宗
老詹事鑿別窮髮膚苟非至神品不肖輕誇譽感君漫相
贈欲報慚瓊琚行當攜硬黃日向晴窗摹

懷心穀兄在盤山

二月清溝風正寒山行自覺筇輿安不知碎玉峯前路此
夜方經第幾盤

荅見初病中見寄韻

潞河春漲水漣漪尺鯉傳來慰所思聞道維摩方示疾誰
知康樂正吟詩衣裘未可頻添減藥餌無妨久護持遙憶
焚香消永晝滿階花影又參差

小驥歌

有序

余得良馬一雖無追風逐電之能而得按轡徐行之致少

陵所云顧視清高氣深穩是也全體淡黑齒甚稚疑古駟
驥之類因名曰小驥歌以嘉之

綠虵紫燕既難見下駟交馳若飛電九方伯樂未易逢虎
脊龍文價輕賤春當三月清晝長銅街十二暄風揚誰家
裏蹄氣神駿繫我門外雙垂楊點漆盧瞳開滿月竹批兩
耳如筍列乍疑果下遠攜來一片寵從麤賓鐵當階授銜
調淑姿態閒意靜情依依圍人受直馬回顧三花不動臨
空嘶是時山桃紅滿路谷鳥參差喚深樹城南買得青絲
籠獨向郊原試徐步左旋右折光威紆踐草軟過重穉瑜
始知良才適人性舉止自與駑駘殊歸來拂拭臨溪水人
道驪駒出清泚何妨蜀錦作障泥更倩珊瑚飾鞭尾君不
見蒲梢天馬同神龍汗溝流血丹霞紅朝遊蒼梧暮碣石

凌厲欲過歸飛鴻又不聞烏號弓開鳴霹靂射雉場前氣
無敵韓盧宋鵲誰能先惟有霜蹄去無跡猗歟此馬何安
詳恥隨凡伍爭翱翔人生到處多羊腸何必九坂回王陽
樂府當年歌肆夏和鸞比德宜風雅老杜曾吟深穩詩至
今想見韋侯馬

題張天扉檢討使滇集後

滇池何遙遙乃在黑水之南且蘭之右紛紛百燹自君長
周世曾聞獻短狗楚王孫子武且雄霜戈月羽通南中至
今遺民猶能祀莊躋蠻謳黎鼓聲籠銅嬌花葳蕤徧冬夏
四時常若三春融又聞漏天晝夜恆苦雨曾無三日吹乾
風南華山人玉堂客奉使觀風到鞬譯朝驅驄馬辭皇
州暮詠新詩盈驛壁青龍灘頭波浪高劃波很石銛於刀

其上青天望常黑其下惟有鼃鼃魚鼃蛟螭鼇誰歎清音
振林木乃是山人長嘯凌驚濤密箐蒙茸雲似障石角藤
梢勁相向汗流絕磴不知疲欲就雲端窮萬狀褻中十斛
青氤氳攜到幽齋自開放千回百折來滇池登高懷古多
所思石虬亭邊煙霧動海潮寺外峯巒齊何況寶珠徑寸
璧徑尺盡作狄公籠內物遠方從此歌得人雅鑑澄泓朗
於月我今細讀山人詩眼中如見蒼山奇溯牂牁之窈窕
循响叮之嶮巖蒟醬筇竹隨地皆可致便欲促王褒逐司
馬遠尋碧雞金馬之荒祠碧雞金馬不可至把卷低徊盼
天際星斗離離繞奇字墨痕猶漬西南翠

四月九日招同紫仙荆帆崙仲江臯循初文錫集
水西莊送摺書還崑山分賦得行字

綽湖窈而曲萍葉綠湖生綽山秀且蔚松影緣山明伊人
別我去遙歸西鹿城沙邊偶獨往林際時閒行開門綽山
近鼓櫂綽湖清莫厭登樓望歸飛雁字橫

題心穀兄盤山記遊集後

一綉芒屨杖一枝薊門深處挾幽奇登高步與浮雲近歷
險身如怪石危春色輸君先得句秋山待我再題詩臨風
把卷窮林壑勝向人閒圖畫窺

哭家天來大姪

日下歌朝露津河慘暮雲幾年風雨共一夕死生分兜率
歸何速芝蘭植易焚閒窗尋舊帙不厭讀遺文
嗟爾零丁早生年坎軻多長愁劉峻傳交謫衛臣歌異地
同塵壻他鄉老薜蘿此身行萬里不復涉關河

寂寞泉臺杏樓蹤
癸地賒無兒陳麥飯
有女泣
荷花澗水波如舊
吳山日易斜
他年酌酒處
宿草又天涯

藕香榭前試舟同獻珍循初文錫

碎雨斜風頃刻收
板橋初就放新流
耳根眼底饒幽趣
無數黃鸝共白鷗

小舸無檣復無檣
恰好同人泛野塘
篙激浪花沾袂濕
釣竿回指綠楊傍

紅螺杯小幾巡行
醉倒船頭晚照明
不得舊時溪口路
但聞山背桔槔聲

送張少儀武昌

山水鄂都遙無因
送海潮相思吳苑客
未返楚江橈
曉雨魚連市
春風柳萬條
離情與古意
好爲寄詩瓢

題王石谷倣趙大年村居圖

十里連桑麻
雞豚聚晨夕
嵐光入戶牖
樹影映牆壁
盈盈夾隄水
斜浸柳絲碧
水鳥自去來
草堂自岑寂
我有田居懷
結想在阡陌
披圖若故林
宛逐耕犁跡
繫誰爲此圖
烏目煙霞客
仿古得其神
毫端涵古色
由來蕭曠意
不僅筆與墨
斯卷千秋留
斯人不可得

和沈永之孝廉見寄韻

迢遞南州一水通
魚書千里附郵筒
共知人對茗西月
誰信舟如江上蓬
舊夢憶殘燈影外
新詩敲就櫓聲中
幽期果踐來年約
願托津頭五兩風

同西顛江臯循初集香雨庠試百花酒分韻得一東

金華書屋遺集卷三
古
淺酌蘭陵美光爭琥珀紅傳來自鐵甕較昔勝鄆筒味必
中冷釀貪知慶井空醉時更漏靜雨過響蕉叢

寄李仁山姊婿項城用杜少陵奉寄李十五祕書

韻

綠暗中庭樹清陰撲袂來懷人頻折簡望遠忽登臺城隔
袁公舊邦傳項子開經年梁月意馬首幾時回

題曹曙瞻二丈澎湖漁隱圖

澎湖麗且清煙月常澹灩澎湖清且平風波不傾險嶼遶
先生老漁叟浮家恰近澎湖口菱絲十里隱瓜廬蘆葉連
洲隔松牖漁艇出菱塘理釣洲渚傷眼前無俗物沙鳥時
迴翔纖塵不起空萬慮影靜垂楊最深處秋霜春露飽經
過歲月悠悠任來去君種澎湖樹我掩直沽扉直沽水雖

清不及澎湖肥他年買棹兼漁具來伴先生坐釣磯

雨中小丹梯追暑

雨徑少人跡憑欄縱目遙雲埋沽口寺帆送海門潮涼意
初侵簟風聲欲碎蕉不須三雅飲獨檢舊詩瓢

中元登海光寺樓寫望同張鴻齋汪西顥陳江臯
萬循初分賦得八庚

暑退涼初至登樓客思清魚簾橋外密稻隴寺前平雲起
連潮色風過帶磬聲佛香吹不斷斜日射孤城

秋夜讀書廊對月懷摺書

夜深人語寂涼吹動秋風仰觀明月光皎皎當天中照我
杯中酒酒清天色空豈不願沈飲惜無良友同良友在何
所玉山渺穹窿別時聽殘鶯今已鳴秋蟲秋花媚幽砌衰

草結幽叢登臺望吳會煙霧昏濛濛諒非參與辰衷情良
可通徘徊星漢閒孤雲忽自東何能托羽翼共作雙飛鴻
相思不能寐落葉響疎桐

題周月東所藏陳方來七峯圖冊子

周君愛古如愛山搜羅不惜窮孱顏舉眼欲出秦漢上置
身宜在邱壑閒昔年示我七峯之古印土花斑斕含繡暈
余時曾作慷慨歌題君壁上鴉成陣今朝示我七峯之新
圖峻嶒怪石如犀株墨痕都作蒼翠色雲煙欲活相蟠紆
七峯乃是七洞天十山之中百尺巔中藏異書數萬卷披
圖使我心悠然未見七峯書聊續七峯句三山九疑自此
去何當更倩西巖添短亭寫我從君來往處

送吳思立先生之西安幕

傳經懷昔日風雨隔南天鼓棹來千里離筵已六年青山
紅樹外白髮綠樽前且盡侯芭酒升沈聽自然
執手念念別秋高班馬鳴上書辭北闕垂老客西京山
色函關路河流渭水聲此行多勝蹟不在府端名

銅鼓書堂遺稿卷三終

男淳孫樞校刊

銅鼓書堂遺稿卷四

宛平 查禮 恂叔

庚申 十月起

渡子牙河河西岸即太公祠

逝者如斯晝夜流蒼茫百里向滄洲渭濱無復西周土父
老翻思北海儔籠岸煙寒鮭菜艇沈波月墮釣璜鉤舟人
指點崇祠在不獨千秋姓氏畱

大城道上

景短覺途長北風嘶倦馬征衣寒色侵西崦日將下舉目
悲蒼涼冬氣森郊野村墟半榛蕪炊煙冷古瓦落木正蕭
蕭聲如細雨灑旅情慣茆店遑思棲大厦遙遙望青帘有
酒未及把攬轡一長吟離思為誰寫

宿束城鎮

停車暮宿束州城無復當關擊柝聲小郭三重成斷隴至
今猶說漢軍營

如林鄉外盡蒿萊繞屋寒鴉陣陣來最是客懷淒絕處曉
風殘月弔荒臺

河閒懷古

白沙飛沒晚煙中落葉無聲萬木空獨我尋詩博士墓更
誰問禮獻王宮馬嘶古道連衰草雁叫長天趁朔風漫把
一鞭頻悵望瀛臺惟有夕陽紅

尋麴義壘不得

漢室解網維九域起塵堦山東諸諸侯蠶食各自大桓桓
袁本初遠近交倚賴本是君山孫宥爲董公拜巍峩幽冀

部河閒實要害旣奪韓馥權復拓公孫界緬想麴將軍於
此聚精銳刁斗肅嚴更轅門晝垂旆遺跡不可得枯木響
虛籟燐火息幽魂河聲怒澎湃

肅寧縣晚眺

小雪風初勁衝寒過肅寧獨慚雲自在誰管葉飄零落日
燒空際飛鴻沒杳冥射雕何處客走馬喜駟駟

沙河待渡

煙外微聞射鴨歌臨流兩兩見青蓑愁風愁雨生來慣不
向船頭拜浪婆

陰霾宿霧卷征鞍颯颯黃蘆野渡寒呼艇不來人獨立一
行沙鳥下前灘

蠡縣道上

蠡湖本漢邑博陵尚孤聳河流今昔改故道黃沙擁雁高
沙草衰壓岸嚴霜重天寒白日速道遠行人恐挾策歌慨
慷懷古思如涌佇弔宣成侯浮雲度高隴

博野縣

側帽垂鞭趁午炊嘈嘈野爵出荒籬凍雲如墨征鴻斷宿
草凝塵客路疲縹緲笙簧八臘廟蕭條風雨二程祠更聞
舊淀名君子覓句因誰問碧漪

邠州

迢遞蒲陰道風迴馬足塵蟾池村寂寞龍井石嶙峋詩業
推楊果忠魂泣沈斌經過無限意休問路旁人

飲雲歌

有序

邠州靜虛道院舊有孫道士蓄一鹿每入山必騎以往後

孫遠遊不返鹿失所依食飲田野閒孫弟子某每欲賣之
輒悲鳴不已而止予適往觀頗愛其馴而鹿亦頗有依依
之意遂買以來名曰飲雲作歌以誌之

白雲一滃仙都靜洞戶無人松抱影松根忽聽鳴呦呦聲
亂松濤鐘磬冷長睂紅頰雙童子聞客開門迎客喜爲言
此院有伊尼錦色斑爛蒼閒紫須臾牽鹿來客前落梅點
點茸毛鮮撫之不驚亦不懼性馴與客相安嫻客問此鹿
來何處云是仙師舊仙馭仙師采藥徧名山此鹿相隨同
旦暮旦遊遠覓陽坡泉暮宿還棲碧澗煙丹山之鸞丹穴
鳳追尋遊戲洞裏天一旦師棄眠雲伴御風自愛飈輪遠
桂戶松扃鎖日閒空畱仙馭華陽館馭失仙師思紫芝田
閒宿草空離披獵徒往往奇其姿不敢誤射黃金鏡幾度

金吉書堂遺集卷四
三
拘牽索美利悲鳴不忍傷離意從知仙獸名不虛恥向風
塵逐騏驥我來自愧無仙骨漫想崑崙叩銀闕腰纏解易
仙馭歸同渡沙河夜深月平生騎馬似乘船恐似知章井
底眠從此不愁眠井底醉時聊學地行仙

將至靜海

莽莽西風裏前途望轉修寒煙空戍壘野燒接陶邱塵糝
黃梁飯霜侵白氎裘如何墮戶日猶自遠遨遊

宣德鑪歌

有序

長至後余歸自瀛博杜門墜戶擁鑪緡南北史又家藏宣
德鑪百數十枚竝責小童培火薰炙友人余荆帆過訪見
而異之遲日攜一小鉢孟鑪爲贈亦宣廟古器余因博采
月餘凡宣德最佳鑪均非易得之物乃集宣鑪譜一編編

成更作歌自書於後

宣皇昔日當昇平疆場無警銷戈兵八方清寧四海靜不
思仙掌樹金莖宮中稽古尚文事博放雲壘訪傳器臣斌
頌式臣棠遵上款俱摹宋時製倭源鉛錫暹羅銅渤泥紫
礦如霞紅鑄錯何論六州鐵刻楮不僅三年工采蘭良辰
日上巳帝遣金人來曲水飛廉鼓鞞祥風和祝融司薪蒼
燄起如神捧出三千鑪三百六十五閏餘本色最珍蠟茶
色小書九重歐陽書上自宮廷下官府琳堂紺苑俱分與
羣言寶氣聚如雲誰識黃金鑠如土星散波移數百年土
埋苔蝕蝸流涎魯人贗鼎先後出甘南施北爭紛然閒來
偶爲搜零落古色年深益斑駁雙魚百乳頗難求象首獅
頭尚如昨當時賜器分羣官六卿之外惟豸冠寧知小几

金華書堂遺墨名四
四
低窗下反得流金炳如丹吾聞大禹鑄九鼎爲燭山林魑
魅影茲鑪但取娛目前玩物之言足深省何似空齋燕坐
時胡桃紋炭火初吹閒徵商代夔龍款勝閱衡山岫嶮碑

書黃山谷蓄狸說拓本後

摩圍老人有奇氣落筆巖巖若天驥少年得力蘭亭碑晚
向黃龍悟三昧吾初操觚見公字癖嗜直過羹與葢規模
猶愛蓄狸篇腕力深沈意英鷲尾題紹聖庭堅記此歲黔
州始安置新聲徧唱歌羅詞幽夢遙通夜郎地嗟公此日
升忉利惟剩遺縑播人世莫道雙鉤舊勢微筆材猶識吳
無至

寄佛日釋子

飛颺奔百卉寒氣侵人衣山僧別來久幽懷如渴飢憶昨

相見初趺坐面翠微各論內外旨黃葉當頭飛門前碧流
水鑑影知瘦肥碧流近作冰黃葉埋禪扉山空積雪深夜
月交光輝想見山與僧奈與靜者違

喜申及甫上舍自都下至招同紫仙荆帆西顛江
臯循初文錫及心穀兄飲舍南小築分賦得九青
寒雲如凍晝冥冥忽報征車遠叩扃我數梅花登小閣人
隨臘雪到閒庭眼前誰市千金駿座上休孤雙玉瓶更喜
卜鄰酬宿諾清吟應許百回聽

和家見初兄病中述懷見寄原韻

惟有離懷鬱未舒詩函遠至歲將除病臞莫怪年來甚佳
句端教錦不如一笑睂申王輔國二分腰瘦沈尚書鄉關
莫賦思歸引早晚承恩侍直廬

對酒

日月驚西馳百川駭東注雞鳴扶桑曉鳥息蒙谷暮人感
血氣生諒無金石固與世空周旋何若草頭露秋蘭在臯
澤煙煖幽芬布涼風倏已吹顛顛復誰顧自非餐霞侶難
追鸞鶴步猶有盈樽酒可以托情悰

龍淵非鈍質冶自南山金未逢薛燭識常向延津沈陶令
示無能乃置無絃琴日夕一樽酒聊以佐清吟詩成倩友
書已盡平生心由來寂寞處千古感人深何事逐紛華不
得開胸襟顧影時復醉高風寫遺音

余有小屋一間三面見日寒冬不火自煖循初下
榻於此因憶宋孔仲古爲楊誠齋創一大閣不薪
不炭而煖勝人間誠齋以小暘谷名之今循初亦

以此名顏屋并詩索和次韻率荅

小屋藏梅宛窖薶三冬晴日此中佳不薪不炭溫如火無
雪無風客暢懷愧我軒楹非仲古羨君文字儼誠齋漫誇
更作寅賓館深夜銜杯酒似淮

題王澹游歲寒三友圖

風吹銀霰如稷珠打門忽致歲寒圖筆力峻嶒氣盤礴傳
是金源人所作蕭蕭瘦竹疎而清梅花數點似雪明惟有
孤松夭矯不可狀三鬣七鬣駭若蛟虬并誰用銀鈎跋紙
尾歐陽原功雲林子含譏獨有黃鶴樵謂其梅蘂異我江
南梢寧知畫家貴意不貴似此語無乃空喧呶最後井村
人綴句流覽前賢多企慕月寒似聽緱山笙擬共歐倪追
遠步憶昔金源全盛期晏閒乃及中興時曠懷恆舉玉堂

金華書堂遺集卷四
事輕紉潑墨春淋漓黃華山主承恩重綈几形墀常供奉
遺文已許藏蘭臺銜墨還聞賜鸞鳳篤生賢子惟澹游親
承家法仍箕裘流傳至今已閱數百載秀氣挺拔猶覺射
雙眸嗚呼雲煙過眼無停瞬尤物尤爲天所吝君不見真
定當年什襲藏卽今惟剩棠村印

辛酉

正月六日西顛江臯及甫循初文錫集清機小庵
分賦同用昌黎人日城南登高韻

春來始逾旬檐鳥吭欲弄開樽俟嘉賓玻璃瓊如凍文宴
古所佳絃管屏不用亦緣丈室小難以容儻從微香簾外
疎笑索梅花共夕陽抱雲歸反憐月色送無愁醉如泥拚
若江東葑或恨謬誤多令肅敢故縱秉燭趁良宵興盡勿

倥傯過客比光陰斯言足珍重

人日遊大悲院

郭外風初暖遊人趁早梅馬遲穿樹出艇活破水來地淨
眞無垢香消尚有灰大悲心未滅可似月光回

花朝前二日岱瞻釋子過舍南小築分韻得觀字
春風猶自釀輕寒坐看蒼苔上石闌山衲忽來敲竹笠園
蔬聊復佐盤餐詩成勝說維摩法花好應參如是觀莫道
良辰難久住登樓未許晚霞殘

哭曹古謙孝廉

春風和暢榮萬木獨翦幽蘭委荒谷人生夭壽數亦奇皓
首爲期難預卜昨秋草草聚京華同把茱萸醉黃菊共說
來年重九時高枕吾廬看修竹修竹依然榻尚懸回首徒

金華書生遺集卷四
憐夢境蹙淋漓嘗爲寫剡藤藤色未渝墨未宿早知筆墨
有時窮恨不生綃寫千幅武功員外謝去冬馬思山殉共
嘆焚芝與折玉惟君先後倍傷情造物戕才抑何酷君家
尚有母倚閭白髮毵毵風際燭那堪新婦怨新昏深淺長
眉畫未熟鶴湖遼闊雲陰陰渺渺羈魂茲往復隻雞斗酒
故人心悵望青門爲一哭

曉雨初霽心穀伯兄招同荆帆西顥江臯向叔循
初文錫過水西莊遂至宐亭舊址歷小園種花諸
處飲趙氏田舍

初晴天氣淡無涯斜插青帘賣酒家遙望水西村路近出
牆幾樹野棠花

黃葦編籬白版扉家家門外野花園澆花纔畢擔花去三

五成羣露滿衣

晚麥青青早麥齊春風吹浪縐平畦地閒人靜無囂事隔
岸村深叫午雞

聞家見初兄凶信

京華消息太無端遽信枯桑入夢殘禁省尚期聯夜直琴
張從此絕朝彈百篇詞賦雲煙散畢世驅馳泡影闌一事
更教悲徹骨箕裘寂寞旅魂寒

檢點年來贈荅書模糊手跡卷還舒加餐辟穀言猶在返
棹歸山願已虛華表有時棲獨鶴泉臺無路寄雙魚欲尋
春草憑添淚鶻鳩聲中夕照餘

初夏雨後園內移花

百卉抱幽姿深淺耀園圃卻喜無纖塵纔洗五更雨含葩

未全敷接葉或半吐頗嫌次第紊整齊在花主繁從南垞
刪疎向北垞補位置得所宜地亦無曠土敢同運甓勞稍
嘗抱甕苦往來芍藥畦香濃日方午

午睡

捲幔鑪煙欲散枕書午夢初回階前花落未落門外客來
不來

雨後憶盤山東西兩甘澗寄法天國一二釋子

雨過氣清和庭花淨如拭遙知澗上松日晴影轉黑疑有
蛇龍藏還愁魍魅匿誰讀名山記蠶粒與辨惑澗泉東西
流晝夜逝不息水說七等中味甘茲未識高僧爲我致煩
我稽古力豈徒云助好聊以慰相憶靜嫌幽鳥喧閒笑歸
雲塞數聲鐘磬鳴禪關景西昃予懷竊耿耿悵望不可卽

寄百超釋子

結就茆菴傍翠微一身惟有鉢相依峯高欲踏層雲上泉
落時驚響雪飛渴日咒龍升古井深宵伏虎護禪扉黃精
苗長芳辰晚想見南山采藥歸

張灣晚眺同崙仲及甫循初分韻得來字

臨流方下馬晚步共徘徊岸古沙全坼橋危石半摧煙衝
飛鳥沒帆帶落暉來魚網高低挂清渠絕點埃

弔飲雲

鹿鹿我無奇入林徒縱鞵飲雲鹿中仙得之頗驚衆昨自
河閒來朝夕堪撫弄角解茸復茁赤色耀蟬螻毛淺燦若
梅照水自珍重知爾愛瑤草曾采靈芝種知爾愛雲液曾
掬清泉供無飢復無渴豈患災害中我思仁裕仁將如野

賓送爾憎野賓野戀如白鹿洞白鹿壽難齊影隨隙駒空
乃了夙昔緣能無片時痛或云是尸解銘移鶴骨共秋來
冢草青誰尋蕉下夢

王戊

繭繭吟有序

自辛酉夏身罹大故麻衣苴杖往來於三河百草溝悲哀
毀瘠強理喪祭窀穸事畢旋守墓廬期年來何能復理詩
文舊業茲於五月十二日展先大人墓痛是日小祥含淚
聊述數語更不自知所云記曰言容繭繭蓋謂居喪之貌
爰爲繭繭吟

昔知父母年不陟岵岵麓何圖省晨昏旋乃悲風木吁嗟
聽無聲言笑猶在目空復視無形杖履往不復淒涼丙舍
晚日落亂山簇雖云兄弟俱相將伴幽獨無奈罔極恩感
此光陰速檢點三百篇蓼莪今始讀

贈孝子張紫垣有序

張孝子星煜字紫垣榆次人總角卽有才名及長鄉黨極
稱孝友母病親侍藥餌衣不解帶百餘晝夜至母溘逝紫
垣痛絕死而復甦者數一夜而鬚髮盡白鄉人見之莫不
驚悼乾隆四年

旌異如例

孝友稱張仲君今繼祖風高堂疾不療一夜鬢成翁驚豈
緼書得愁真集字同

聖朝隆至治無事別求忠

百草溝雨後望田盤諸峯

草芳柳翠雨初經
靜愛泉聲倚樹聽
山色遠從天際落
白雲遮斷數峯青

投普度菴

孤寺向夕投炊煙
散空庭禪燈照暗壁
老僧獨誦經殿古
人跡稀我與佛共聽
疎林生虛籟屋角飛
流螢深夜不能寐
淡月侵窗櫺

題沈石田荆樹再花圖

連蜷老榦撐青空
千花萬花齊發叢
問誰寫此入圖障
有竹莊中石田翁
石田翁寫此傳是醒
愚蒙三人樹底相閒
列年齒雖異貌頗同
一興長嘆兩悲泣
對花慚愧還鞠躬
云是京兆之田氏
祖父積澤貲計豐
詰朝炊煙議分割
百年老屋殊西東
回頭見荆樹人三樹
一荆不公斧斤何可

赦霍霍喧磨礮呼童視樹樹忽顛
半死直過龍門桐三人相向咸感慟
淚點落迸殘英紅樹也尚如此人也何
旨聾急還合庖爨終身和輯如斯蝨須
與樹復活翠影春玲瓏孝門田氏共傳
詠平原內史詩句工君不見瀛州劉斗粟
尺帛六院恆相通又不見義興陳百七十口
共室無殊宮凡今之人莫不有兄弟曷勿鑒
於此樹坐看枝葉常青蔥

寄高五雲孝廉

都門握手憶臨岐
雲水迢遙與夢馳
征雁北來欣有信
秣陵西上定多詩
騎驢懶赴看花宴
製錦先占奉檄期
何日論文重翦燭
好憑紅豆寄相思

送萬敬懷之官粵東

百粵太平年之官
自日邊前程一萬里
如下九重天滇水

荆江遠羊城越嶺偏南征記可續時望寄新篇

題朱崙仲大洋泛月圖為吳中林賦

生平好讀木華張融賦彷彿洪濤生竹素亦曾廣閱王詵
董羽圖儼升員嶠窺方壺直沽去海百里近裏足不前良
可哂羨君宦跡真絕倫長嘯時時聾蛟蜃昔年八月之正
中曾張布帆趨便風上天下海湛一色月光倒浸玻璃宮
船頭叫絕清樽濃手酌沆瀣澆魚龍長鯨卻走不敢吸惜
哉予無羽翼來相從今日置身圖畫裏明鏡當頭水瀰瀰
何須更向鯤身鹿耳門海在堂堦月在指

寄田在田

歸去結田廬誰尋處士居如何三歲別不寄一行書老樹
鳴蟬候疎篁解籜初此時幽約好昨夢到窗虛

秋夜

一天霜月照窗明欲寫離懷句未成只怕西風吹落葉滿
庭如雨作秋聲

西沽晚歸

西沽水冷野風疎艇載茶煙并束書斜日半林秋柳外荻
花深處賣鱸魚

石橋西畔斷霞浮豆子航邊晚市收獨坐船頭看雁過數
聲啼破海門秋

小院

小院秋光薄微風動落花苔痕幽石砌蟲語夕陽斜

聞雁

霜月冷淒其天邊旅雁啼聲連還復斷沽口夜雲迷

金華書生遊雲卷四
三
九月二日鄭悅山中翰閱晴巖孝廉舟次津門過
訪索沽上題襟集兼以詩投余在三河展墓及歸
聞尚未解纜賦此走留

蟹紫鱸肥秋水邊角飛城外暮生煙閒中纔返山中展沽

上何如漢上編花底吟風中翰句悅山見投詩有有約春

吟風潮頭繫月孝廉船編郎莫唱吳歌去好醉西莊白雁

天

送江臯之揚州

遊心昨已到揚州新曲何當感舊愁風雨滿城爲作餞江
淮一水此登舟醉憐紅葉情無限幽約黃花夢可留廿四
橋邊秋寂寞定看霜月憶同儔

過念佛寺訪黃思順

訪友來蕭寺煙寒碧樹秋潮聲喧海舶梵語靜僧樓入饌
毛魚細盈觴菊釀浮晚憐憑眺遠極目到林邱

贈佟鍾山中丞

朝畫山南薰殿暮畫山梁王苑朝山暮山興不孤舊畫新
畫喧九衢千峯萬壑生腕底終年弄筆衫裏烏憶昔公游
半天下山從人面雲傍馬意到酣呼試一揮寂寞還將奇
險寫崎嶇宦途危復安驚波忽過隨安瀾由來起落無定
跡當時只作畫圖看卽今年已七十八見畫依然雙眼豁
我有金壺一斗墨請公暇日爲一潑

舍南小築對月懷循初

西風颯颯響籜筴滿耳蟲聲入夜虛竹逕荒來因避客秋
衣典盡爲收書直沽水冷花黃後小閣燈殘月白初遙想

南湖湖水畔也應把酒憶吾廬

訪周月東不遇

偶乘舴艋過君家茆屋疎籬傍水涯避客羣兒呼鍵戶畱
人老僕喚烹茶菊花三徑書聲寂晴日一窗帆影斜暮向
渡頭頻悵望西風返棹散林鴉

寄岱瞻上人

風吹雁影遙萬籟靜孤聽爲憶田盤僧日夕初入定悟空
一點燈清心數聲磬石罅咽寒泉松子落危磴門外雪花
深鹿跡沒樵徑我寄寂寞懷可愜山中興

冬夜懷陳江臯萬循初

空堂寂寂遠囂塵供我蕭騷物外身疎竹響餘前夜雪梅
花香逗隔年春爲憐小社添新句翻覺虛窗少舊人鑪火

共煨燈共翦幾堪回首獨傷神

又聽嚴城報二更霜花侵幕峭寒生孤舟乍去懷陳烈一
榻高懸待萬庚楓落紅橋波正冷月明醉里夢還清迢遙
南國音書杳目斷江天雁字橫

高翰起舍人自都下至招同潘廷簡汪西顥王逖
先集若槎分韻得二蕭

佳人來海國把酒夜迢迢硯凍詩難就窗明雪未消孤燈
虛四壁冷月淡中宵醉向階前步風生竹影搖

次韻和杭大宗編修冬日園居

竟日虛窗坐生涯筆硯閒居非當要路門自笑常關檐際
風蕭颯階除鳥往還新詩吟又就惟我識君閒

自題畫梅冊子寄家星南兄揚州

銅鼓書堂遺彙卷四
殘歲不可留急於蛇赴壑晴窗日影遷拈筆寫凍萼孤根
最奇古直榦亦峯粵聊狀寒瘦姿幽蹤寓寥廓吾兄久睽
離南北天涯各昨聞攝山長秉教振木鐸生徒肅衣冠執
經侍幃幙餘技探詞源長河豈憂涸揚州繁麗地歌吹竹
西樂數里接清江梅花繞郡郭水曹多賦詠詩興動官閣
千載繼斯文風流猶可作道遠書未通幽懷悲索寞曉夢
落蕪城誰人解騎鶴津門霜雪多閨淡層雲薄南枝寄此
心驛使遙堪托

銅鼓書堂遺彙卷四

男淳孫樞校刊

銅鼓書堂遺彙卷五

宛平 查禮 恂叔

癸亥

人日南樓望雪同劉紫仙潘廷簡汪西顥分韻得
雪字

層樓接諸天歲改春未泄登高應靈辰風舞如掌雪長松
頂乍掩枯柳腰更折參差城闕居皚如玉山列呼朋命樽
酒酒薄腸不熱幸有雕龍談表裏飛瓊屑農家慶豐年詩
人喜令節欲采西園梅街南斷行轍

送西顥之閩中將軍幕

又是天涯別淒然淚滿襟那堪一樽酒重話昔年心把臂
筵前少消魂日復深臨岐無所贈惟有醉沈吟

還家知幾日問訊北堂安夜雨湖聲急春陰野色寒爲憐
征路遠莫使客衣單愁絕重回首斯行偉節端
炎漢初封國深知習俗違風和稷雪少土沃荔枝肥藤鳥
啼綿雨蕉花映落暉相思須寄字春盡雁歸飛
暇日將軍府吟詩勝論兵島雲連野戍海月冷孤城候館
勞新夢津門感舊情何時重北上春酒更同傾

花朝同紫仙廷簡堯卿集水西莊分韻得五微

茸裘未許換春衣西墅招攜坐釣磯風戛林梢禽語碎雪
消山徑草芽肥旋開燠館催花發更拂雕梁待燕歸清酒
一樽供小飲良辰相賞莫相違

泛舟至水西莊

出郭尋春一扣舷晴光水色好春天楊花繞岸輕於雪荇

葉穿波小似錢黃鳥啼殘深樹裏夕陽紅到小橋邊回舟
已覺郊原晚兩岸蒼茫起暮煙

聞申及甫補中書舍人

六甲分司佐宰臣鳳池清淺映絲綸後庭鈴索頻宣喚可
有人呼醜舍人

畱春詞和堯卿

東風吹散九陌陰花開未開春色深遊人只惜開花晚誰
信花開春已短芳草如雲復如煙銜泥燕借雕梁眠幾番
紅雨秋千索又是嘗梅燒筍天何人不放東風去斗量黃
金買春住

送杭大宗歸仁和

一曲離歌醉濁醪南園欲別首頻搔從來身價文章重此

去湖山品望高滿屋詩書雝永日六橋煙柳泊輕舸歸程
莫自嫌蕭瑟白眼科頭興正豪

檻虎行

南山虎跡深於椀山下行人愁日晚阿誰偷翻猛虎巢奪
得虎兒虎怒咆黃公赤刀有神術押入圈中難得出四圍
逼側牙爪拳俵鬼無靈宛羊質籠盛車載入市來小兒拍
手聲喧逐呼眠則眠起則起偃蹇不及駑與駘君不見漢
家酷吏紛羅織一怒頓生乳虎翼甕邊熾火亦有公求死
不能生不得又不聞濮陽將軍戰若神飽則食肉飢噬人
白門樓頭遭索縛大耳談笑居華茵彊梁失勢顏如土夙
昔英豪誰復數憑君更看圈中虎

重五日集南園聯句送百超上人還盤山兼寄岱

瞻上人

繚曲古田盤懸崖散飛瀑

潘世仁

山鳥鳴閒關山花開陸續

禮勝地寄靈蹤幽人緬空谷

劉文煊

杖笠飄然來笑言澹無

禮欲趙州茶試煎雲門餅初熟

查義

青蒲插膽瓶紅榴壓茆

禮屋重午景正佳過歸意何速

義

蕭散結宗雷殷勤語信

文煊宿把手念孤鴻翹心對修竹

世仁

更憶棲碧菴松陰覆階

禮綠

五月十九日集水西莊送李向叔之祁州

無端幽賞處客動故園情倦燕風回舞新蟬雨過聲吟貪
泉石靜香拂芰荷清極目離亭路晴雲天際生

七月八日岱瞻上人過訪

曉聽窗前卓錫音僧來揮塵我披襟一庭雨過梧初落三

徑煙荒草未深沾水不妨邀淡月秋山應許續清吟眼中
色相空還未識取蓮花不染心

雨中坐竹笠亭觀紫仙犀若對弈

尺幅勞方寸爭端轉眼空爛柯山外局一笠雨濛濛

秋夜苔花館對月與岱瞻上人禪話

一輪秋月照虛無窗外蕭蕭響碧梧館簇苔花人跡少清
言不復別僧儒

星垂碧樹作珠林不似浮雲變古今採取天淵無限景鳶
飛魚躍察升沈

蒲團坐破三更月藜杖看殘一片雲性海茫然空世界壑
舟不合狎鷗羣

幾爲多聞一世忙拈花微笑卻尋常笑余三十年來事特

爲今宵一面牆

八月十日杜禹門刺史賑饑來津

宿水餐沙雁正飛野空忍念蟹初肥秋風漫引青絲騎夜
月重經白板扉粥罷都亭人有數戶詳曹史吏無譏社倉
誰得因君請朱子當年策可依

對月懷西顛閩中

如水天光入夜清懷人高館不勝情紅蕉落影浮煙砌老
桂飛香徧海城寂寂關山同月色迢迢雲樹隔秋聲憑闌
欲待南征雁寒漏泠泠已二更

重九後二日同紫仙廷簡登海光寺樓分韻得四

豪

蕭蕭落葉散林臯興愜幽情不憚勞去日旣多來便少重

陽已過補登高未能放眼窮千鳥何處移山戴六鼇卻怪
枯僧嫌寂寞鐘聲斷續吼蒲牢

苔花館月下對菊同紫仙廷簡犀若堯卿分韻得

五歌

窗外孤峯似髻螺庭前秋色十分多當筵月白人初集遠
浦霜清雁正過對客偏慚青眼顧寫真須借醉顏酡一生
良會知能幾欲遣餘歡挽逝波

來蜨亭對菊獨酌憶水西莊

修竹搖西風有聲無落葉野菊擅秋容霜洗黃金鑿水西
數帆臺臺前山幾疊菊山高處壓松鬣咫尺山水愁登涉
坐看來蜨亭邊一色黃數叢叢叢愛似攢秋蜨蜨夢冷蜨
意癡白衣有約來何遲顧影自酌酒盈卮陶令之後誰能

詩古人寂寞今煩惱空說秋花勝春好傲霜亦有顛顛時
照水芙蓉特先老

晚宿河西務次韻廷簡

茆店依河曲煙生暝色侵風高征雁斷雲冷夕陽沈薄醉
非耽飲常談且整襟客中愁永夜翦燭續清吟

題墨梅冊子寄贈汪近仁處士

有客遠自蕪城來貽我一枝枯瘦梅疎花錯落老榦古宛
若雪後當簷開客言畫者有茶癖茶舍清絕無纖埃眼前
羅列惟茶具竹鑪火筴瓶盃時烹一碗畫一幅茶香暗
作梅花胎濁賢清聖問不荅青杉屋下書成堆我憨雖不
識茶味亦知畫梅塗蒼苔潑墨爲寫雪後意枝南枝北光
皚皚關河千里難會合詩藉驛使爲良媒他日江南探梅

去定許啜茗春風臺

寄棲碧菴岱瞻上人

不見山中僧三月勞悵望遙想山中居巾瓶各無恙翔風
吹海國遠道感幽曠靜理托名言淵情寄高唱棲碧在何
許山氣空瀾漭殘雪冷枯泉寒雲凍孤嶂

臘八日宿普度菴

寒雲襲征裘游子淒暮色鐘聲穿樹來僧舍舊所識卸鞍
走僕夫芻藁休馬力明薪然地鑪曲身一時直老僧話良
辰佛粥爲進食清香溢竈觚果豆兼黍稷回頭感歲徂年
事咄咄逼衣霑京洛塵何暇更拂拭

甲子

銜恤吟

有序

禮於辛酉痛先嚴之變癸亥臘十有四日復遭先慈之憂
三歲中兩罹大故哀毀餘生齒搖鬢頽萬念俱灰矣光陰
苒苒又屆小祥展拜遺像低首悲吟詩曰出則銜恤入則
靡至嗚呼蓼莪之感人至矣哉

去年憶此夕母乃棄兒亾呼天復搶地五內無寸腸忽忽
一載周茲辰屆小祥母今不可見遺像中堂張牲筵旣陳
列更獻酒與漿彷彿母在時執匕勸母旁有酒終不飲有
筵終不嘗低頭一下拜涕淚千萬行林鳥尚返哺跪乳思
羔羊傷哉罔極恩俯仰慚穹蒼

苔花館獨坐漫成

苔館無人日漸長年光鼎鼎去何忙半窗鳥語春初暖一
屋梅花午後香書爲貪看多強記酒因易醉怯頻嘗年來

自是情懷惡翰墨緣疎詩思荒

題履方仲兄畫蘭軸子贈蔣肇予觀察

畫蘭不在多一筆兩筆成叢窠畫蘭難畫葉反正敲斜藏
轉摺畫根尤比花葉難一團生意根中盤鯽魚之頭丹鳳
眼縱橫錯落交巒岬阿兄畫蘭三十載萬葉千花畫不怠
師今仿古用意深意盡還從幽谷采蔣君重素交氣味如
醇醪頻來沾上水嘯傲傾羣豪偶見畫蘭云可寶臨行索
我題圖杪畫蘭雖好詩不工請君自訪蘭澤江西東

次蔣鳴夔韻送蔣肇予再任江右糧儲觀察二首

章水東流足灌輸青驄又喜出燕都灘前乍識新瀧吏湖
口還迎舊驛夫拜手番君青浪穩經心廬阜翠峯孤檐帷
果應重來約南浦飛雲景不殊

到日春風拂野棠司農仰屋費籌量 朝廷賜復還除賦
閭里催耕更課桑燕賀正宐浮酒杓鶯遷先已卜著囊新
詩莫吝頻相寄句裏江山定老蒼

雪中丁字沽待渡

角飛城外雪正飛丁字沽邊人渡稀遙天一望寒雲白村
村矮屋藏煙屏尋梅獨向雪中走呼渡不來空褰手憑誰
寫我待渡圖戴笠披簑臨渡口凍柳棲鴉叫不休滔滔河
水雜冰流酸風刺面吹愈急隔岸漁罾帶雪收

謝盤山百超釋子惠青豆

田盤老僧自犁松閒田閒來復種松下一畝豆豆花開日
秋風前豆莢肥時秋雨後秋雨後雁南飛撥黃葉自采歸
山厨幾夜著火焙顏色翠過搗藥山童衣封題遠寄海津

客香味新鮮如乍摘宛然坐我豆棚邊飽看嵯嶢峯頭一片石

題張曾山盤山下居圖爲高季冶賦

古人擇鄰處今人隨地居仁里不易得名山尚堪廬名山
薊北少惟有田盤好泉石清且佳其中足幽討高君意在
泉石閒振衣千仞盤山顛喜逢江南畫師張曾山爲說移
家莫若此地偏圖成特我顧悵望空山暮歲月易蹉跎何
年果移去家具零星滿碧岑茆堂清寂松棚深有妻有子
室以成奉母閒居不廢吟春日呼童課種花秋日花開燦
似霞落霞凌亂驅歸鴉詩情遙繫長松榭不聞城市春惟
聽疎林風不聞城市語惟聽疎林雨一綱芒鞋徧山踏鵝
泉鷹嶺尋山衲棲碧菴前鹿往來陶元洞口雲開合躋攀

偶上衛公臺臺高望遠心徘徊一聲長嘯清萬籟百靈驚
若孫登來我昔曾遊此山曲西風颯颯吹林麓千樹霜楓
盡著丹幾叢修竹猶含綠碧雲罩寺梵音清種魚池中波
光明層巒疊嶂無人行一片松聲和雁聲三盤看徧秋山
色策蹇歸來歷荒棘至今夢寐恍若披此圖還期卜鄰來
住君家側

得許渭符邑令淮寧訃音

回憶題襟日清言臭若蘭初心違捧檄永別在之官有母
編遺集無兒拜冥餐尺書前遞去病目可曾看

銀魚謠

直沽銀魚生寒渚歲歲食魚賤如土今年魚市無剩鱗食
魚之人如食銀嗚呼一條魚價重百金值何不割君一餐

魚濟彼貧民百室食

采芝行

我不願乘風上瑤天撥雲騎鳳隨羣仙又不願破浪涉海水走蛟騰龍跨赤鯉但願長作崑崙山下耕芸民瓊田萬畝耕千春夜來靈雨過瑤島三十六芝如曙雲繁星歷歷明堪數中有一芝名翠羽竊得天厨玉炭紅笑和白石開鐺煮君不聞南山茯苓光繹繹歲久無神成琥珀又不聞北山枸杞吠狺狺歲久不鬪蒼毛新自是山家富珍錯鼎烹不羨函牛藥他年采獲得餘閒重撰芝經附飛鶴

題馬文毅彙草辨疑後

欃槍未掃鼓聲繁碧血爭教聚一門廣福寺前草不長烏金鋪口日猶昏如何尺紙雲煙動宛似當年蟲鶴喧遙望

孤樓名擊笏千秋常鑒九原冤

題陳睂公墨梅冊子

空山藏古梅老根穿石裂疎花欲放時點點帶霜雪幽人圖其形紙上散玉屑閉門謝徵車結念在高潔竹邊影忽橫水際枝半折畧綴海紅花素豔竝清切此公胸中邱壑多畫梅故與凡手別自題句工書復工吁嗟鄭老具三絕殘歲寄百超釋子

松風謾謾冷僧寮歲晚山深斷采樵聞說今年霜雪重黃精根凍未生苗

上方精舍足幽棲獨坐長吟到日西一縷茶煙數聲磬嶢峯下石雞啼

乙丑正月至五月

金真書定遺集卷五
九
人日風雪交作暮霽對月獨酌

春氣寒於水吾廬冷若冰一樽人日酒片月雪窗燈顧影何妨隻吟情轉欲增更深眠未得曲檻幾回憑

雪後小直沽逢周月東

偶作郊外游積雪迴風舞茆茨緣岸低隱隱鳴社鼓林空挂寒暉徑仄斷荒隄日午動炊煙野爵噪聲聚忽逢東郭生殷勤握手語詩肩聳若山心遠貌益古相期春候暖看花具雞黍話久日西沈月色照南浦

春寒

臘雪連春雪春寒過臘寒養梅瓶凍裂呵硯筆敲殘曉日侵檐淡東風入幕酸擁鑪聊自詠書卷不能攤

上元日有鸚鵡入苔花館成五絕句

滿院春風寒未收誰家鸚鵡過牆頭兒童解事還多事閉入金籠話不休

前年彩蝶戲花陰亭得佳名直至今若使翠襟來日早合

將來蝶改來禽色癸亥歲苔花館東北隅小亭落成適有五

牛能識字鶴能歌丁鄭風流近若何從此不須頻喚客定

教朝夕學吟哦

有羆無口貌如羊鉤吻丹味汝獨彊百鳥莫如烏鳳異可
能度曲合宮商
趾分前後各成雙性不宐寒避北窗何日更添秦吉了恐
爭笑語未能降

春望曲

春晝長春色淺深院無人風力軟朋來乘興一登樓樓頭

簾捲珊瑚鉤殘冰剩雪堆牆缺匝月餘寒尚未收流光冉冉如飛鳥未到花朝春尚早填倉舊俗志良辰對景莫辭今日飽遠寺微聞渡口鐘女牆歷歷夕陽紅仰望更疑天有外一行雁字沒長空美人何處調絲竹隔巷遙傳離別曲曲中哀怨不堪聽鸚鵡杯深春酒綠春酒綠勸君觴春來有酒不盡醉春去誰憐君斷腸

王生吟

有序

王生名御天桐鄉人父客死天津生未知所在聞信徒步走三千里齧指出血徧覓於津城西荒冢閒竟得父骨遂負以歸嗚呼西郊之原客冢纍纍其不得首邱者可勝道哉豈盡無子者哉若王生者可以風矣

河邊白骨紛如雪河上旅魂泣霜月誰人半夜聲悲哀浙

西王生尋父骨王生家在梧桐鄉團圞父子安耕桑父兮遠遊子在舍歷歷不復知存亡一旦客自津門至與父同遊鄉各異問父今年在何地謂父形骸空壟寄王生哽絕徐復蘇麻衣竹杖行崎嶇角飛城邊盡荒冢欲尋枯骨春模糊割兒指頭血滴親原上骨骨朽尚有苔血深光不滅千山萬水負骨歸肌膚慘黑容顏摧兒呼兒哭父不應白楊風起聲淒悲嗚呼漢王陵晉溫嶠伏劍絕裾愁不少何似王生負骨返松楸寒食年年一祭掃

雪後招岱瞻同紫仙季冶過苔花館分韻得十四

寒

一館何幽寂閒吟得古歡半窗春色淡滿徑雪花殘老衲禪心靜詩人禮數寬斜陽畱不住小酌餞餘寒

花朝喜萬循初自陽山至招紫仙汝咸驥調江臯
季冶岱瞻及履方仲兄集苔花館分韻得人字

料峭東風拂海津征鞍乍喜拂征塵三年別去多新句後別
循初有江船縣萬里重來得故人薊北有花春已半嶺南
齋北郭諸集無雪事還真相看莫說離懷闊且盡樽前酒入脣

悼亡妻李安人

十六年相共茲晨影忽孤淒涼帷畔影彷彿病中呼舊物
諸般在遺言一句無盈堂皆縞素痛定復長吁
庭草含愁色林花帶淚開還疑經日別猶望暫時來藥裏
紛難拾衣襦亂作堆尤悲小兒女驚顧不知哀
夜枕神無定春衫淚不乾倉皇勞客慰顛顛畏人看後事
惟同穴前途已蓋棺老親頻涕泣何術與承歡

題履方仲兄春風圖為陳江臯賦江臯時年五十

春花拂砌紅春水環郊綠讀君春風圖寫我春風曲春風
飲人醇若酒灑灑山桃濯濯柳五株晴絮颭門前千樹晴
霞迷渡口迎春月浮春煙午風暖晚風顛春風駘蕩年年
至二十四番信所自欲繪春風風無形桃柳卻滿春風意
阿兄點染入生綃筆底春風聲欲起問春何歲上古八千
年問風何來天池九萬里

春夜對月

花落春將晚東風暮尚寒可憐今夜月不作昔時看放眼
輪空滿低頭影自單雲鬟香霧句字字盡愁端

長別離

游絲飛空百尺長春風吹斷隨飄揚春來繾綣簾帷側春

去天南與海北海水廣且深天涯曠難尋願爲共命鳥莫
作單棲禽但知甘苦交相倚不道睽違隔生死浮雲黯黯
慘河梁望斷東西溝內水溝水自東西生死苦相思相思
苦作斷腸曲腸斷人間長別離

圓圓嶺頭月既圓旋又缺月缺魄還生不似人間永離別
青苔滿戶塵滿堂鏡臺銷歇羅衣香平生攜手路搔首空
晨暮年光隙中駒形薤上露入門亦自念新衣未必新
衣適如故昔爲鸞與鳳今爲參與商昔者常相竝今者空
相望長別離長離別哀歌悽愴誰能節絃斷秦箏不復膠
江頭枯竹悲聲裂

水西莊側營亾妻厝地

生寄死如歸亾者土爲宅日時未云利違暇謀窀穸西郊

永豐屯園地頗閑隙灌木若叢生蔓延草萊積翦刈得畝
餘權厝非逼窄開囊卜青烏曰吉莫他擇面河水勢急水
齧岸常坼培築使之堅鳩工計千百上繚四周牆及肩纔
數尺還藝柏與松庶以奠營魄回思共游衍曾此數帆席
誰知幽窆存俯仰感今昔

乞高季治書亾妻權厝志銘

余生太屯艱風木感誰訴喪偶又繼之形影自相顧牛眠
未協卜草簡治喪具暫竊衛河漭陶甓護風露墓誌宜永
藏例亦及權厝所愧懿行微未有奇特著萬君吾篤友鴻
文照連璐記述幸不誣取裁合程度韓環必雙引越劔豈
孤鑄不得孟公書何由耀丹素孟公筆力健銛鋒殺秋兔
揮毫倘不惜寵過萬金賻弱質藉以傳寧徒慰泉路窗明

日影靜硯凹墨瀋聚巖石待摹鐫翹足若寒鷺

浴佛日招劉紫仙潘廷簡吳驥調陳江臯萬循初

高季治集苔花館分詠陸鴻漸茶具得都籃

茶具紛零星斂藏復有具博士意周詳篋叟急先務截竹
剖雙單織闊兩交互初看三角斜旋見方眼露玲瓏尺五
高長短皆合度提攜泉石閒摒擋慎封護大體在包容何
暇述細故載錫都統名職司太貞素譬諸良友朋佳日盍
簪聚萬事無不然經箱書作庫

蔣孝子行

有序

蔣孝子行爲遼陽蔣君韶年作韶年父國祥爲長蘆運使
乾隆丁巳以事謫戍踏拉侈羅而臺去京師數千里韶年
屢求代父不得壬戌五月出塞省覲復懇臺帥帥憐之爲

奏請

詔可父歸尋卒韶年旋亦放還所戍地苦寒惟宜種黍相
傳古屯田處有二碌碡猶漢時舊物云

塞草何茫茫春有積雪夏有霜誰與出塞衝霜雪蔣生代
父去朔方蔣生家本冠蓋里堂列鼎鐘門列棨一朝棨折
里門摧阿父遠謫陰山之北陲牽衣啼阿父塞外地寒苦
阿兄且治家阿弟隨父去隨父去不如叩天闈長槐夾
道下有嘉石肺石可以通訴言劓肝持作紙滴血持作字
父能旦夕還兒能代父遠安置蹉跎志未遂日月潛推遷
兒嗟不見父屈指已三年三年鬱鬱度寒暑萬里終當省
阿父男兒敢辭馬上勞地下陳情天上許兒出關父生
還兄當奉庭闈弟當老陰山

聖主恩情更稠疊前許出關今許入歸來涕泣守松楸墓
上風塵邊外雪蔣生蔣生真孝子至行遠追曾與史我爲
作歌風閭里言辭不文意樸俚金管欲書空視此

蘆筍聯句

已過河豚時蘆芽尚如筍萬光葉短未紛披苗長盈尺引
潘世虛中方夏茁直上員波隱禮鬚繁雜蘚苔根屈互蛇
仁蚓劉文織織迎曲渚采采陟幽吟高搜爬不厭深攜拾俄
成捆泰販夫喧巷市野客動頤吻仁買歸比竹萌異嗜繼
莒本禮濯泥蕘自牧批籜璞枉韞文畱尖斂手柔去老利
牙齦鑽牽連玉切珥搖漾水浮準泰登筵快鮮新入口屏
肥腴仁居然山澤癯不與煙火近禮又如嘗太羹平淡有
餘蘊文解熱借寒冰清神佐良醞鑽闌干盤易空輔頰響

還殷光昏氣殊韭薤苦味異茶堇世淡泊志可明咄嗟辦
或窘禮多嘗生疾疾老饕幸節樽文白露零蒼蒼西風一
宵緊鑽

乳燕和循初韻

又見梁閒燕生雛舞院中語成音未老翅掠羽初豐哺食
猶勞母隨飛尚借風卻憐小兒女不與爾相同

誠女

空牀長見暗塵浮嬌女詩成記室愁臨几正須人教繡當
窗不解自梳頭今朝門內言誰命昔日燈前課最周七誠
無忘勤誦讀西園回首感松楸

無

銅鼓書堂遺稿卷五終

男淳孫樞校刊

銅鼓書堂遺稿卷六

宛平 查禮 恂叔

乙丑 六月起

曝書日招劉紫仙高五雲惲哲長潘廷簡周月東
吳驥調陳江臯陳東麓朱秋亭萬循初集隱書樓
分賦天津古蹟得逆河

大禹疏九河八支一為榦入海復同流奔騰勢雄悍石城
有故道風雨久淪漫或云在浮陽長波尚輸灌經生好聚
訟畫地少成案千年紙上言贏我望洋嘆桑經不可續酈
注誰能贊歷陽化作湖長水沒無畔盈虛理豈無得失自
茲判復觀溝洫志迎逆字改竄新莽好讖符百度焚絲亂
忌諱到河流愚陋資笑粲端居閉一室塵事脫羈絆源流

湖夏殷典故攷秦漢鉤盤蹟未湮徒駭身堪按空憐袁本
初猶憶公孫瓚卽今興水利稽古得條貫芻蕘可獻言廊
廟有勝算平湖通浦潑斥鹵生葭亂安能溯洄尋一辨南
北岸

六月十三水西莊作是日亾妻歿已百日

春風上巳隔泉臺屈指今朝百日來死後語音空記憶生
前容貌已疑猜兒孤淚落扶枯木母老心酸奠舊醅每到
西園腸欲斷夜深惟望夢中回

荷花生日招高五雲潘廷簡吳驥調陳江臯萬循
初集藕香榭題明陸叔平福昌院圖卷子分韻得
二十五有

句吳城內甘節坊古寺重元自梁有陸卿捨宅因瑞雲廣

袤周遭五百畝宋時始改承天名或號雙峩爲土阜鐘樓
經閣相對開銅佛中供無量壽其閒北院名福昌諸院原
從一寺剖自經劫火恣焚燒壞屋敲椽屢崩朽能詩文士
楊儀曹挾客閒游月在九偶題小句金橘黃澹飯清香適
齋口同時和者沈祝兼蒲薦松牀共揮肘通靈妙墨世易
失後起松公稱上首補圖更倩陸叔平仍寫三詩附於後
吁嗟叔平畫品高落想不與時俗偶輦錢如山求一縑閣
筆無言但搖手細看此幅益瀟灑瘦竹高松閒槐柳簷牙
石角曲折成筆意濃纖不少苟我愛吳鄉去未能披圖仿
彿逢良友咫尺雲煙什襲珍畱貽孫子千年守他時棧棹
近吳臺勝地信如茲畫否

六月二十七余生日也萬循初孝廉以余號藕汀

為作藕汀圖見贈因自題三首

外直中通碧玉莖任移漁艇結鷗盟我生適際荷生日卻

怪荷花先我生六月廿四為荷花生日

低斜水榭柳垂絲澹澹波光淺淺池筆到空濛天影接勞

君更譜藕汀詞

參差蓮葉晚來香秋後陂塘風雨長記得青藤詩句苦不

須重畫兩鴛鴦

貯天泉聯句

北地秋始梅李定業柱礎潤於沐涼雲興四郊萬光泰急雨灌

羣木建瓴似湧濤禮布帳旋張幅長繩四角緯高積水中

心蓄繞院集盆罍定業沿階走童僕承露笑金莖光泰擬溜接

筧竹勝澗置筒車禮業驚流挂飛瀑喧聲雜鼓鐘鑛濺沫循

堂屋小汲已千甌定業深藏俄百斛空齋憺無事光泰嘉客來

不速參差較泉名禮次第試茶錄辟寒桴炭攪鑛去滓縑

囊漉隨風用杓揚定業弄月待手掬有耳鎗共移光泰無突竈

須復紫玉玦浮沈禮藍英末攢簇比峽似九清鑛較雪頗

不俗敬宜醴酒先定業味亦太羹樸新經續桑酈光泰舊品廢

張陸巖居甘可分禮瓢飲樂還獨貞茲君子交鑛勿果小

人腹定業

岱瞻上人至自盤山同廷簡循初季冶以心清聞

妙香為韻得妙字

披雲望海津隨風下雲嶠盤山秋色深津門日西照往來

不覺遙相見惟一笑在家猶出家我獨憐同調高枕愛吾

廬靜比僧房妙開軒集同人拈韻憑舒嘯良朋只二三挑

燈受禪要古情不易得世事頗難料人生無百年何當論
老少因果如樹花君看花影掉形滅神何存千秋亦徒弔
八月六日雨後廷簡循初季冶岱瞻集隱書樓時
樓前秋花盛開分韻得庭字
隱書樓外戶常扃高下秋花滿一庭細雨初收蟲尚語涼
風輕拂蝶旋醒禪心擬就名僧證談笑無妨陋室銘月透
虛窗聊泥飲天光遙入竹樽青

寄汪西顥閩中

閩水蕩瀆淪閩山森巉嶮佳人天末畱別我三年遠年遠
悵索居相思惟素書去憑孤飛雁來憑雙鯉魚魚雁屢空
寄離情復迢遞風雨聽雞鳴相於賴難弟弟昨自南來話
舊勸深杯爲言兄曠隔惻愴中心摧心摧正相憶旋道當
來北引領望征帆遲迴不我卽曉樹何晶晶夜月何盈盈
思君在朝夕不覺桂花生

水西莊晚望

闌干倚徧恨無涯渺渺烟波望轉賒日暮水禽池上過數
聲啼老白蘋花
欲去重還步晚林愁懷不展似蕉心空園秋色秋聲亂獨
對黃昏淚滿襟

重陽後二日過海光寺

已過登高候林塘古寺空雁隨霜葉下人坐磬聲中颯颯
荒階草蕭蕭破壁風老僧因臥病閒却菊花叢

鬢策歌

角飛城邊黃葉飛角飛城上冷斜暉健兒捲蘆作鬢策塞

恨關愁吹一一此調本是伊涼徵羽聲憑虛引氣鳴不平
天河下垂星斗明孤眠旅客夜起心魂驚我非征夫非羈
旅復感悲淒淚如雨含愁似怨關山阻復似臨岐斷腸語
初聞鼻辛酸再聽摧心肝饑猿嘯絕壁落雁啼清湍在昔
李袞關瓘稱善手紛紛巴里今何有宛轉餘音隨折柳長
松敲倒枯桑朽空房歸來行莫偶三嘆不堪重回首從今
願遣蘆葉不復生庶使人閒永弗聞離聲

雪夜

雨雪霏霏冷透檐鑪紅香細手頻拈昨宵月影看初缺今
夕風聲頓覺尖薄酒誰從愁裏勸寒衣自到夜深添不眠
頗得安禪意我與孤燈色相兼

十一月五日同廷簡循初向叔季治泛舟訪周月

東不遇還過洪濟北極水月諸菴分韻得素字

仲冬河未冰潞水猶可溯漁舟檣岸久喚客起寒鷺須臾
縱棹游晴光散林霧故人居不遠轉眼茆屋露鄰煙動午
炊鵲聲噪枯樹入門偏悄然狼藉惟茶具不聞室中琴空
脫戶外屨同人急呼舟徑往無復顧紺園舊可尋次第隨
閒步初逢竹院僧旋謁蓮臺塑更探水月影鏡花微妙悟
回看月一鉤人散斜陽渡往蹟竟誰畱拈毫寫心素

冬日同紫仙廷簡驥調江臯向叔循初季治水西
莊分賦寒事得裏桐有序

桐北產也嶧陽孤桐紀於禹貢楚邱琴瑟詠於衛風然性
實畏寒冬日以稻薪上下縛之來春始華予考古種桐法
正二月閒以黃土拌秬末少許或盆中或地上上覆土寸

半許時時用水澆灌使土長濕待長尺餘移栽則至冬不用苦蓋是術也予將試之

枯枝未作爨薪聲特爲龍門護半生藉用白茅知物重棲來青鳳待巢成關心空井雙株冷回首虛窗一葉驚佇望東風解束縛繞簷花發正清明

臘八日同朱崙仲周月東戴閻成潘廷簡吳驥調陳江臯陳東麓楊涵遠萬循初高季冶游海光寺酒後以冰牀代馬校射爲戲予因作歌自哂

嚴風栗烈嘉平月朔朏纔過俄八日竈觚豆粥似餉稠古寺焚香齊拜佛約我同心儔牽拂城南頭不蹄不輪亦不舟連翩共坐冰牀游冰河一片如明鏡卻隔天光不倒映雖非平地無風波烹羊炙酒樂事多酒酣興發爲詩魔忽

思觀德示正鵠將牀作馬冰作陸一篙反比四蹄速三矢遞發手眼忙我矢旣直我御良勝者持觴負者飲醉看日落煙蒼蒼子虛烏有公無是萬事回頭均等耳來春冰解牀何用追風逐電自古皆有死吾生不如祖逖鳴先鞭又不能短衣匹馬看射猛虎終殘年夏蟲語冰劇可憐笑問坐中客謂吾然不然

望日喜家堯卿姪來津集苔花館同紫仙廷簡循初季冶分韻得十四寒

話別河干上分襟一載寬去披霜葉冷來踏雪花乾綠酒傾樽滿奇書啟匣殘牀頭文史足勉讀且加餐

示淳兒

古人勤志學多在十五前讀書兼勵行不受外物牽嗟汝

質本魯惟魯古最賢希賢詎敢望爲學志定然孩提賴母
慈訓育共仔肩今年母忽逝至性幸無遷旦起入書塾夕
歸號重泉何以報母慈庶幾功苦專嚴冬氣凜冽澤腹冰
益堅不見坡下羊跪乳隨母眠不見巢中鳥反哺隨風翻
汝母不可復饑寒應自憐汝母不及待敬養惟空筵志須
知所立學須習所傳母誅顯何年在汝心拳拳

題王履仁衡山採藥圖爲李向叔作

王郎肘健下筆勁寫照不須問名姓圖中有客肖向叔古
貌宛然頭角稱云是昔年歷南岳拖筇戴笠探幽徑山童
隨處亂泉聲結念欲窮草木性晴雲橫斷老松根天風吹
落金樞鏡山中倘遇李八百乞取刀圭保長命
歲晚集水西莊同季治向叔分韻得五微

酒債殘冬急詩情入醉微隨風掃落葉無月繼斜暉天曠
雲鴻斷水堅水鳥稀思家座有客未肯遽言歸

丙寅

正月十日海光寺放魚用東坡西湖放魚韻與具
區廷簡循初堯卿同作

水底拾魚如拾塊隔水鞭水如鞭背水開水活魚拔泥一
道渾流橫似帶野翁矜物恣朵頤便擬攜歸充斫脍可憐
鬣損尾俱紅更惜鱗殘首竝碎呼童鬻取全其生脫命庖
厨入淵瀨駭鹿仍歸豐草閒羈禽重出雕籠外雪消南郭
閒相逐舊事西湖偶成會漁人晒網趁斜陽月吐寒光照
東海

題沈松年風木圖爲家七倫兄作

樹常欲靜風不休風摧枯木幾能留古來孝子娛菽水不
忍歿後思椎牛吾兄侍伯藍水涘膝下承歡似鄉里玉關
終未共生還至痛獨傳圖畫裏年來吾亦泣臯魚丙舍松
楸啼乳烏猶有蓼莪遺屋在愁看風木舊時圖

處時亦作
風木圖

東木來自滄州經宿即赴都門邀飲不至

簾外春風已四朝君來卻值落燈宵看花最喜梅連屋敘
別何嫌酒一瓢不道高軒人易去空餘西閣月難邀殷勤
爲寄京華字歸路重經慰寂寥

題張長庚春江話別圖爲履仁作

苧村有桑者品與倪黃倫昔看畫徵錄夢寐懷其人王君
天末來顏色何溫溫示我春江圖筆底無纖塵鴛鴦湖水

暖二月繁花新垂楊拂青萍盡是江南春是時愁話別載
酒迷芳津畫意半詩意無言妙有神我非畫中人烏能寫
其真何年共君往把釣湖之濱

送潘廷簡孝廉歸仁和

春風日日吹平蕪潘子束裝將出都問君行色何忿促客
久思歸湖上屋湖邊晴翠抱孤城幾載夢斷湖水清留君
不住執君手未別且斟臨別酒憶昨蕭齋相見初交期何
啻陳雷如宵分短燭朝研露點易論文忘日暮春鷓秋蟀
俄五年一旦日歸情黯然人生未得如麋鹿終擬棲巖同
卜築蒼雁頰鱗莫久疎尺書頻寄慰鰥夫長林漠漠浮雲
遠君到西湖春漸晚摘茶挑筍吟新詩鄉物定應異舊時
春夜苔花館聽楊天益彈琴

金真書堂詩集卷之八
戚戚復戚戚空階夜岑寂山人抱琴同月光入戶琴
聲哀起如十二峯頭雲乍散孤猿三叫悲腸斷止如十八
灘頭水潺湲落雁一聲念離羣我琴無絃桐梓綠化作孤
生嶰谷竹感君慰我良宵愁更奏人間離別曲吁嗟乎山
人爾琴誠太悲慎勿再彈烏夜啼慎勿再彈雉朝飛
三月一日招岱瞻釋子紫仙循初向叔季冶堯卿
集苔花館素食分席閒蔬菜得嫖姑
瓊田誰遣產雲芽竹蓐桑鶯未許誇雞足竝屐支翠梗蜂
巢攢簇抱空槎神清合化松閒雪道遠猶含塞上沙便當
維摩香積飯好邀天女散天花

上巳紫仙循初向叔季冶玉衡堯卿書山集水西
莊以蘭亭序分題得修短隨化

西郊宿草青歲紀一周復忽憶蘭亭游壺觴屏絲竹念昔
還悼今彭殤互歌哭去水逝不回來日轉如轂夢無黃梁
炊碁少爛柯局修短共斯須奇節亦鹿鹿壽與天齊傾仍
恐歲月速達人悟遷流行樂追秉燭回首看斜陽吾思剷
蒙谷誰能向扶桑更將飛晷東

題王履仁嬉春圖冊子用楊鐵崖嬉春體第二首
韻爲吳驥調作

春風醺人如酒濃提壺閒踏春山空垂楊自織煙外綠好
鳥靜啄花閒紅短衣露頂作狂客豐貌怡顏疑乃翁今年
春色添春季勝事較前同不同是年閏三月

題王履仁之閒圖冊子爲東木作

少時讀孟子分途識利善孳孳無不爲俱自雞鳴判作狂

或作聖一念千里遠愚夫惑羣紛失足墮塗炭智者審其
幾隱微若顯見吾宗有老孫異書歷覽徧逍遙樂林泉世
味莫歆羨偶然渡清江北游壯畿甸近訪沾上友討論繼
昏旦王郎善寫真朗朗頰毫粲擁被念前修雞鳴夜過半
屬余題小詩警策登道岸自愧學力微茫洋隔河漢還書
孟子辭餘語不能贊

晚晴同循初作

一雨惺忪過斜陽透竹關落花情帶別棲鳥解偷閒垂柳
風中線奇雲天半山何須攜蠟屐徒倚勝躋攀

霪雨不止紫仙犀若循初季治履方仲兄同阻水

西簡詩四首

天末陰雲濕不開詩人齊上數帆臺敲碁纔罷重看水展

齒時應徧古苔

板橋泥滑浸迴瀾土嶺煙深密柳寒日暮漁歌來極浦水

西半似白蘋灘

重簾不捲落簷花盡日閒吟手獨叉莫笑空齋太蕭瑟夜

窗兩部有鳴蛙

蟬聲寂寂鳥聲稀涼氣侵人薄葛衣爲問愁霖誰作賦句

慚康樂勿余譏

方于魯墨馬歌謝家堯卿姪

方大激製墨古作墨馬歲壬午壬爲水黑非白黃午爲馬
類非牛羊賦形肖物各有意豈效名畫曹霸江都王明時
墨推前後方羅邵吳程次第爭頡頏今見此馬最神駿不
獨墨良馬亦良勞君脫贈光案几君癖真如王武子牀頭

有書多闕譌嗟我癡叔雖有佳墨何能磨

十月一日集水西莊同紫仙循初季冶堯卿書山

分詠寒柳得一先

萬縷千絲一望捐裂膚風起大隄邊腰殘不作章臺舞情
盡空餘送客憐色減九秋仍有葉寒交十月早無蟬憑闌
誰寫蕭疎態依舊斜陽帶暮煙

自題畫梅扇頭壽吳中林

古梅滿溪礪疎影浮清冷輕煙淡披拂山空石氣清高士
惜晚晚美人悅娉婷賤彼桃與李春日榮郊垞昔賢圖歲
寒松竹無凋零中有嶺頭樹芳潔配長齡呵凍畫數枝幽
香凝短屏遙知屋下叟端坐方勘經

雪後紫仙招同犀若循初季冶堯卿書山飲雪舸

分韻得五微

城上雲同雪片飛雲開雪霽月臨扉共憐踏凍詩神王莫
道驅寒酒力微五夜開樽疑水國一椽如舸傍魚磯遙思
魯望傳文宴何惜論交與俗違

立春日李同人員外過訪苔花館招同劉紫仙王
具區萬循初分韻得十七篠

青旂昨迎春斗杓夜東繞土脈回微陽漸覺寒風少詩人
遠道來逸興出塵表唱和繼松陵雅飲追竹篠流光逼歲
除俗事欣無擾莫惜漏聲遲高吟堪達曉

銅鼓書堂遺稿卷六終

男淳孫樞校刊

銅鼓書堂遺稿卷七

宛平 查禮 恂叔

丁卯

八日劉紫仙招飲老是齋遲汪西顥不至

黏雞感時序翦燕懷芳辰誰登定王臺極目望早春明燈
照良夜過飲劉伯倫觥籌紛錯雜歡笑驚四鄰言念都下
客遠自南海濱萍蹤茲又近有約來天津咫尺隔關河迢
遞空音塵惟覺交情舊欣如物候新愆期竟誰咎忘形負
我真且盡樽中酒離懷難具陳

寄上方山達聞釋子

歲首風日佳春意漸鼓盪滿城沸簫管昇平徵豫暢遙念
上方靜孤雲棲疊嶂僧房無俗氛山光復無恙入定毒龍

降摩空健鶴放妙悟運虛靈枯坐隱色相我愛山中梅老
榦虬龍狀幽香遠莫聞瘦影疎誰傍未得踏雪尋日落徒
悵望何時信宿留不須攜紙帳

吳中林過苔花館見盆梅已放有詩見貽依韻和
荅

春光自此漏機關有客尋芳獨往還樽酒未開詩早就幽
人何處夢尤閒祇須坐石邀殘月應勝騎驢遶遠山更說
西溪梅最古相期放棹水雲閒

送萬循初之陽山

春寒夜靜同翦燭濁酒一杯歌一曲曲終未終愁復愁離
情別恨聲斷續丈夫意氣重慨慷肯因離別生悲傷無如
萬里客他鄉五穀無味花不香同行誰是舊時友一身一

僕劔一口嶺樹蠻煙路正遙淚落春風馬回首

寒食過水西莊雨中作

歲月侵尋歎擲梭身同泡影感滄波水西寒食煙火冷門
外梨花雨正多悶檢殘書人懶讀喜添新漲客須過可堪
載酒呼漁艇獨把魚竿濕短簑

題錢舜舉明皇幸蜀圖卷子

延秋門外夜烏啼翠輦平明已向西不比驪山遊十月年
年綵仗簇鞍齊

玉貌騎驢緩更嬌君王回首尚魂消佛堂梨樹逡巡到可
惜咸陽路不遙

汾水秋風旅雁飛聞歌想亦共沾衣鈴聲閣道淒涼雨彈
指圖中伴侶非

天寶繁華一夢中空將遺傳付陳鴻金釵錦襪供黃土愁
絕傳神習懶翁

上巳後二日劉紫仙吳中林朱崙仲吳驥調陳江
臯姪堯卿集飲來隄亭梨花下分韻得一屋

春色共六分四分去何速晴光豔暮春遊人麗春服童冠
不可追禊事遲堪續雖無山水佳自有好花木一開塵外
襟集此樹閒屋門前雪色幽檐際煙如縠靜看蝶影迷妥
處鶯聲熟卻笑早梅寒橫斜老空谷更羞晚杏紅抱潔媚
幽獨家釀撥新醅園蔬充野蔌飽任亭上遊醉卽花下宿
低頭各沈吟舉頭同醒目新月忽西垂詩成互把讀天籟
激清音不必絲與竹

詠苔

落花時節燕初來春雨纖纖長綠苔深淺無人知所自轉
羞萍是絮爲胎

結客少年場行送魏功夏中翰還廣昌

門外落花高一尺春風披拂垂楊陌挾彈難逢遊冶兒舉
鞭卻遇長安客長安宮闕入青雲臺觀東西象魏分幾見
獻書丞相府不妨長揖大將軍鳴珂原說金張里結交何
論貴公子趙璧無雙且贈人吳鉤一笑緣知己萬卷填胸
意氣豪清波屢染鳳池毫紫薇宿處鐘初靜黃紙書成日
未高別來幾載章江夢歸去吳帆北風送沽水千杯濁酒
傾津城一夕清談共走馬翩翩自少年鬪雞空復五陵煙
尋常不作慷慨語匣中長劍倚青天

四月一日阻雨八里橋

金華書室遺集卷七
三
清晨理行裝出都已過午前途趁斜陽忽見山雲吐僕夫
急驅車樹葉驟鳴雨疑來破浪船還聽射潮弩朔風衣袂
寒泥塗馬蹄阻輾轉向危橋橋邊茆店古停車復解鞍氣
結不能語安客坐繩牀炊煙動篷戶推窗水漸高篙聲雜
柔櫓惟有漁者閒簑笠未云苦須臾棲鳥啼孤燈伴羈旅
深夜夢難成簷流亂愁緒

大風自燕郊至百草溝

雨聲聽徹夜雨歇曙雞鳴理鞍就征途泥滑卻復行燕郊
喜在邇曉市咸趁晴飢腹聊爲餐黍飯兼豆羹大塊忽噫
氣樹颭屋瓦驚飛沙遠拔塞千里陰霾橫咫尺不可見何
以趨前程僕夫氣更豪力與盲颭爭攬轡鳴長鞭轉覺馬
蹄輕昨知雨易阻今知風可迎息駕百草溝夕照慘不明

兩耳遽難靜四壁寫餘聲

重五日訪崙仲不遇

三閒茆屋靜一徑短籬遮綠竹新抽葉紅榴老著花到門
迎稚子問客動鄰家貰酒人何處徘徊日已斜

沈確士自吳門詣都停舟見訪畱飲舍南小築

學士聲華舊江湖理釣篷遠辭茂苑月暫泊直沽風枉道
勞攜杖開門快翦蓬清樽照短燭一笑酒顏紅

題朱振公未信圖冊子爲郭怙菴觀察作

汾陽世胄多奇英建旄仗節江漢清麒麟不局萬里駕更
踏秋風榆塞下歸來華髮鏡中多慷慨還吟出塞歌檢圖
偶比昔時貌豐頤丹頰今殊少彈指流光二十年儒生本
色尚依然當陽武庫才無敵手把一編常不釋書聲遠遏

楚江雲竹馬咸思郭使君松姿鶴采遙堪挹未得拜君空
竚立健筆凌霄乏楷模數縑如對魯公書何時一渡桑乾
岸親就墨池看染翰

早秋月夜懷周月東

虛檐鳥聲寂暝色入柴扉秋至梧桐老涼生豆莢肥一庭
花影碎三徑足音稀此際河干客知應帶月歸

采菱曲

瓜皮船船影綠湘竹篙篙影曲篙長船狹入水寬菱角齊
齊萬花簇去年水深菱葉深釧聲入水深難尋今年水淺
菱葉淺苔痕砌水淺柁轉水淺水深難預知菱多菱少亦
隨時春早種菱秋早擷流光暗與波光移妾住水中洲郎
居水上樓聞歌疑覲面舉棹隔波流裊裊菱絲疑織翠願

郎莫學菱絲脆纖纖菱刺繞柔波願郎莫學菱刺多風輕
舟小平於掌唱徹菱歌明月上水蓼花紅秋夢爽夜闌更
撒千絲網

秋夜聞早雁

候雁南飛急空庭夜色闌影隨秋月落聲帶早霜寒萬里
關山遠千家砧杵殘懷人孤枕上遲恐雪漫漫

贈王崑霞道士

曾住齊雲第幾峯何年北上寄遊蹤名從白社吟中得
臺倡人在黃花冷處逢垂老心情同野鶴未衰筋力付孤
和集筇一囊斜挂秋風裏徧踏天涯訪赤松

送李開地歸吳江

相逢仍草草握手向河干風細帆初穩秋深客漸寒尋常

臨別語聊復勸加餐屈指吳江路霜楓葉正丹

九月晦日馮計六司馬招同王崑霞吳中林朱崙
仲余犀若周月東陳江臯高澤公心穀伯兄履方
仲兄集南溪送秋分韻得五歌

自別重陽景易過秋惟今日更如何同人莫識悲來處開
口無妨酒後歌吟瘦菊英花事盡飄殘楓葉雁聲多誰堪
一夜西風緊沾水寒深凍白波

阻風畱宿海光寺分韻得十蒸

岸有艤舟莫敢登阻風蕭寺伴孤僧窗明喜得畱人月壁
暗還添照佛燈禪榻坐來僵似鐵吟髭撚罷冷如冰夜深
遠聽濤聲響殘夢回時尚曲肱

題沈畹叔侍御所摹杜文貞公小像

未謁少陵祠草堂寂寞窺何時得觀少陵像顏色生如千
載上隱拙齋頭摹寫工寫貌還如寫隱衷開元天寶君臣
盡孤影獨弔萬山空千四百篇詩卽史憂國憂時託微旨
何年招得彭衙魂未覺飄零未陽死披襟戴笠歷險夷躑
躅誰與論安危棧雲劒閣虛無裏鞠膾遙拜南池水

寒夜近圃步月

燈火村頭暗家家揜竹扉疎林無剩葉殘月有餘暉隄外
孤舟泊天空一雁飛尋詩憐獨步霜氣冷侵衣

小雪後二日履方仲兄招同趙飲谷劉紫仙王崑
霞吳中林朱崙仲余犀若陳江臯馮計六高季冶
心穀伯兄家堯卿姪集舍南小築賞盆菊同用歐
陽永叔希貞堂東手種菊花始開韻

我荒三徑常杜門疎懶不避旁人諄舍南有菊仲兄栽招
我看花樽一倒叩門雜遝過高軒知兄意不私所好悵憶
陶公望白衣籬邊形影徒相弔烏皮小几倚窗前種種名
盜射光耀藥仰花垂蜀錦張或如解語或解笑就中黃色
品獨高點石稜稜露孤峭最宜弄影夜懸燈隔簾小立窺
窈窕更取寒英秀可餐踰期轉遲霜信報誰聞小雪菊始
花意必栽培有祕要秋容未老豈知冬應勉同羣弗輕躁
卽景何殊洞裏天安得對酒人常少

雪後近圃晚望

連朝且怯裂膚風雨雪紛紛叫斷鴻徧野乍驚衰草白平
臺近倚落暉紅雞啼茆屋寒煙裏樵斷荒邱冷樹中塵世
閒愁盡忘卻獨傾杯酒望長空

十一月五日招同劉紫仙王崑霞吳中林朱崙仲
余犀若陳江臯馮計六伯兄心穀仲兄履方遊郭
氏園林

聞說秋前花補栽穿池苦屋徑重開河流不共門牆改依
舊潮聲早晚來

小小茆亭仄仄橋最宜人處有疎寮天寒羣鞞尋詩到冷
淡生涯借一宵

城南積潦冷沙洲洲上飛鳴集凍鷗枯柳幾株平野闊斷
霞殘照水明樓

荒煙漠漠入林墟小艇迎流打槳徐自是今朝非亥日沙
頭舉網故無魚

是日倩漁人打魚
至夕不獲一鱗

數徧歸鴉遠近村酒闌燈上正黃昏蒼茫暝色愁難破旋

透疎林月一痕

題東坡贈李方叔馬券拓本後

東坡先生出玉堂，僣從奕奕生輝光。車前騰蹕有二馬，竝是君恩寵賜者。東南水國例肩輿，一馬乘之一馬虛。故人卻遇李方叔，無馬無輿行踟蹰。脫驂以贈敦古情，杭州太守多賢聲。復恐他時馬或賣，特書公據爲馬戒。方叔家貧芻粟空，馬瘦售難生計窮。山谷老人更書券，定價應須二十萬。不惟得馬且得書，馬雖不足書有餘。嗚呼二子風流傳世永，舊搨至今猶峻整。古香幅幅飛煙紆，墨光豈異天閑駒。我家寶此若球璧，日夕摩挲賞遺蹟。千金駿馬誰能易。

題王履仁飲馬長城窟圖軸子爲惲哲長作

秋風蕭蕭苜蓿肥，邊城夜雪如沙飛。朝來騎馬踏邊雪，河水成冰寒晨暉。圉人牽馬循河窟，白草連天馬蹄滑。遙憐一掬清冷泉，中有千年征戰骨。太平時節無烽煙，罽帳蘊廬人晏眠。箭鞞在腰弓在手，短衣射虎南山前。惲侯好馬如韋諷，笑倩王郎寫銜鞵。何年出塞歷燕然，更爲天家勒碑頌君不見。燕頷班超飛食肉，良材駕馭須良牧。壯心誰宥羈騾。

雪後得汪西顥閩中夏夕坐戎幕西池見寄作依

韻和荅

載酒清狂憶次公，草元寂寞老揚雄。魚鱗屢寄燕南字，蛟脊仍論海上功。殘雪光陰無客伴，徂年風景轉丸同。西池山翠應如舊，翹首疎梅畫角中。

來詩云別來何事堪持告日日山光滿目中

石榴

安石畱佳種冬筵薦酒新銀盤光奪目珠顆綴如鱗皮剖
宐書壁花開憶過春千秋槎使蹟紅綻復精神

寒夜獨坐苔花館

不堪殘臘底愁坐寂寥人文史三冬歉撚髭一字貧窗寒
燈漸暗硯凍墨難勻吟罷誰相和惟須酒入脣

戊辰

正月至五月

題竝轡圖

竝轡聯吟一水閒詩成馬上看青山香塵繡陌馳情處芳
草難尋舊路還

過慶國寺寄周月東

故人家在河之北水邊茆屋半敲仄朝來走喚渡河船急

溜淺水渡不得卻尋精舍過浮橋禪話偷閒空百役僧試

新茶煮剩雪想見故人舊顏色故人臥病還卷舌

月東近抱風疾

語言不正不吟而瘦久謝客何日須跨煙外驢與我共分松下

席老衲拈花一微笑覺我詩思猶塵跡人果何心我無物

松有枯時煙瞬息

寄岱瞻釋子

老衲憚崎嶇避險入平陸田盤山水佳遺跡畱空谷本無
一塵染何用八解浴訪道轉差池因人徒碌碌譬鏡無蓄
影照形還自觸但宐物外遊靜參幻境熟偶爾事紛華轉
恐浼幽獨急當返空山面壁休欲速

李鐵君過訪畱飲苔花館適余有都門之行不獲
久畱賦此志別

閉戶讀古書頗識閒靜趣積蘚繞階除孤蹤寄徐步幽人
忻見過握手話情慄酌以一杯酒論交道親故潞水君方
來青門我復去高懷雖傾倒合并苦念遽相思白髮生相
別感遲暮良會自有期投膠固吾素新詩若秋水塵土無
著處吟罷暮雲橫夕陽淡煙樹

黃村道中

東風猶峭寒入骨利於鏃策馬辭故廬田野景堪逐輕煙
生遠壟黃村忽在目倚樹編茆籬緣岸結茆屋農家抑何
閒婦姑竝雍睦始知畊俗淳坐享靜者福循牆更北行南
園路尤熟此日息春蒐呦呦聽鳴鹿

宿立禪菴同潘廷簡高季冶分韻得十三覃

西郭麗夕照青山淡晴嵐驅車信行邁塵土撲兩驂行行

數十里暝色昏西南新月旋又落疎星仰虛舍老馬飢且
疲夜行路不諳遙村燈火微向黑時一探須臾及旅舍客
滿我何堪前途慎崎嶇按轡重趨趨石橋沙口橫春林暗
幽潭徑仄多曲折途窮得荒菴馬鳴尚蕭蕭鐘聲自齧齧
佛燈耿窗牖煙篆裊香龕殿前接古檜僧房走瞿曇老衲
呼不起堅臥如僵蠶禪榻借半宵良友惟二三誰能四大
空自笑一味愁坐此十笏地頓消五欲貪共擬象外遊聊
款箇中談身閒愜靜境心寂窺妙參獨憐詩有癖甚於酒
是耽吟到雞欲鳴一枕幽夢酣

花朝廷簡過近圃小飲

草草營茆屋沿河一徑斜閒來宐學圃久立爲栽花梅塢
連詩社魚磯傍酒家最憐帆影過拂樹帶殘霞

故人京洛住乘興不須招馬尾攜琴薦車前挂酒瓢春風
猶未暖宿雪已全消官作田間侶何妨暮復朝

題李子雅太常柳陰垂釣圖卷子爲高常侍太守
作

微颺拂水生迴淪沙上晚晴宜釣綸滇江去官饒逸興蓑
笠乃作煙波民煙波之民貌清古有魚無魚默不語著船
高柳清陰多任爾斜風和細雨李侯畫手洵奇絕筆底溪
山自旋折何時寫我坐清沽一片空波釣殘月

送潘廷簡宰太湖

螢案懷民社分符此日行一麾初釋褐百里卽專城山表
司空氏湖疑震澤名烹鮮聊暫試何以慰蒼生

沾水春流緩相將憶去年校書同翦燭琢句每當筵別夢

花村雨行旌麥壠煙河魚南北近芳訊定能傳

題沾上校書房壁

故紙鑽研作蠹魚一生難盡古人書不爭亥豕由來誤竊
恐朱黃此去疏聊藉家藏充腹笥未堪謀食代耰鋤卯金
曾有然藜說可似揚雄傍石渠

不飾棖題不畫梁結茆環堵也成堂偶憐竹色通鄰塹爲
避花枝矮蝟牆漏盡三更嫌夜短陰分一刻喜春長論文
近復多良友窗暖時添墨瀋香

寧郡王過津見訪舍南小築敬賦

海內咸推德業尊高軒何幸過衡門勞心王事功尤峻
接席春風氣倍溫鳳尾詞新承雅教山家禮簡愧清樽河
間自昔稱謙抑行訟誰如此日敦

荒祠遺烈傍松楸曾奉鸞章筆力遒

王曾書七政爭光四賜額懸先七烈祠

字崢嶸輝土壤千秋鄭重寶銀鉤

盛朝不啻旌廬感懋

德何須結草酬惟報昇平勤護惜從教榆堡勝眠牛

紫禁朝回麗日長東園泉石自徜徉籃輿探蹟乘高嶂

王嘗

遊上方花譜牋名及傲霜

著有東園菊譜

冰雪聰明懸藻鑑雷霆

聲勢屬文章不煩僚佐稱開府獨擅才華見老蒼

暮春招同劉紫仙吳中林朱崙仲張曦亮陳江臯

萬循初高季冶家堯卿睦周姪集近圃分韻得十

一陌

春深氣暄和繁花滿籬柵爰作郊外遊何必山中屐河塽

隙地肥堪藝麻與麥昨歲小經營版築堵俄百軒楹藉茆

茨啟牖見阡陌遠非辟疆園別爲甫里宅農指及牛蹄亦

頗費籌畫不勝畚鍤勞自信詩書癖方愈采薪憂頓覺煩

襟釋開樽泛鶯黃擊鮮金鯉赤味長惟菜羹野蔬近可摘

孤亭聳樹閒平疇當几席村翁負耒歸好鳥鳴向夕薄醉

娛嘉賓刻燭勝賭奕

立夏後一日登海光寺樓

人生真幾何彈指春又夏佛閣峙城南登覽及清暇綠洲

魚具陳撲岸盡魚舍迢迢新綠生水暖白萍化沙畚草自

芳何不種諸蔗否或樹桑麻其利竝可射籌茲庶富謀吾

亦願耕稼日夕淡煙波蘆灣閒柳汊獨笑心跡閒鳥歸吟

始罷

苔花館遲高澤公上舍不至

日斜人不到月色上窗虛得句無多字閒將竹葉書

金華書堂遺稿卷七
樹密足音稀靜如空谷聽落紅夜更多深沒蒼苔徑

四月晦日雨中招循初季治集沾上校書房分韻

得沾字

小圃衝泥過沾衣雨似珠南人船代馬北地水名沾階靜
垂紅藥池深浸綠蒲驚心將仲夏布穀已交呼

題項孔彰松陰高士圖

胥山老樵客不屑俗士伍平生好畫松枝葉最疎古白衣
餽酒來手寫空壘與壘中桃柳枝亂作春風舞茲圖亦寫
松百樹密難數下坐兩高人相對寂無語但看松陰深缺
處松雲補松根立瓦亭松頂見橋柱飛泉石罅流噴瀑漲
漁浦晴煙起夕嵐濕氣成山雨披圖想幽境几靜日當午
動我躋攀心空巖結徒侶

銅鼓書堂遺稿卷七終

男淳孫樞校刊

銅鼓書堂遺稿卷八

宛平 查禮 恂叔

戊辰 六月起

六月朔日 乾清宮引

見恭紀十六韻

南薰閭闔啟百爾觀

宸楓輦路趨來肅觚稜望處崇習容人踧踖列仗曉曛曛
花影周廬側槐陰閣道東初隨銓吏入共在近光中茅拔
欣茹彙葵傾喜照同仙冀舒一葉瑞鶴侍三公念切颺言
慎儀慚拜手工

天顏輝日角

睿聽邁堯聰乍仰文章煥回瞻象魏通普天皆奉朔何地

不呼嵩位次班聯定才多疎附充姓名蒙

特記草野感微躬

是日部曹四人禮特蒙記名

臣職冰淵勵

君恩盼睐隆退思驥尾附敢謂馬羣空願矢涓埃分馳驅

荅

聖衷

百草溝展墓

先壠隔山縣展謁每逾年春晨履霜露俄鳴灌木蟬驅車
出青門烈日中天懸迤邐過通路河水清漣漣遙望見丙
舍草棘荒數檐遂瞻冢上樹濃陰已嫵娟五鼎古所重一
官今偶銓何當去羈縛常此守墓田

登竹閒樓晚望

消盡浮雲天際寬小樓檐壓碧琅玕日斜漸覺風來爽月

上應摧暑氣殘歸馬羣嘶苜蓿地征帆齊泊蓼花灘憑欄
遙指京華路回首空勞思渺漫

畱別心穀履方兩兄

也愛棲遲里巷閒年過三十等跳丸懸弧漫說男兒事捧
檄聊承老母歡驛路非遙纔信宿家書最重是平安叢叢
煙樹東西屋永日心隨沽水瀾

荆樹田家有幾人隔牆相喚笑言真窗前難得青燈舊鏡
裏俱憐白髮新世事風波驚後淡人情骨肉老來親對牀
他日如聽雨定說東華踏軟塵

自楊村至蔡村隄行三十里漫成

暑氣逼人癡孤雲出岫奇不知馬上客何事苦吟詩
林陰蟬共噪隄外水潺湲獨有漁樵靜無言自往還

沙頭環密樹樹裏有人家盡日柴門閉籬根長蓼花
沿隄三十里一曲一回長古驛綠楊外樓頭紅夕陽

七月一日煤市街寓齋對雨遲萬循初家堯卿姪
不至

三伏氣鬱蒸赤日午九灼官曹晚稍閒歸寓興磅礪雷聲
忽殷地陣雲乃頓作須臾白雨來疾若髀箭落大風復鼓
盪天地啟橐籥檐溜垂修修居人震索索微涼爽襟袂塵
土靜城郭焚香讀古書濁酒還獨酌言念沾上客來都前
有約夜夢寂長檠晨興誤鳴鵲遲遲累朝夕咫尺離思各
詩罷已黃昏雨過捲簾幕

曉過高粱橋

萬翠如帷覆曲渠紅闌宛轉曉風疎高粱橋下高粱水一

路潺湲送客車

遠寺鳴鐘暗渚煙晨星幾點逗吟鞭閒鷗浴罷荷香處屈
指重來已九年

立秋前五日 圓明園侍奏

五柞長楊 御路遙柳陰深壓玉驄驕觚棱隱約如三殿
豹尾周圍近九霄景過方壺紆勝地仙從員嶠佐 熙朝
林棲最羨宮鴉穩也傍朝曦掠苑橋

題董孚存學士秋江返棹圖爲王履仁作

前年相逢沾上雪披圖曾話春江別
履仁北上時張長庚
徵君作春江話別圖
贈以今年共踏東華塵披圖欲棹秋江雲秋雲如絮江如練
布帆斜展如歌扇疎林隱映遠山青滿耳江聲楓葉零棹
歌莫唱吳江調夜靜江寒不忍聽

西廠望西山出雲

西苑傍山根西廠地尤曠周覽謁奏暇
皇居信宏壯羣山青邈迤環繞若屏障
朝來雲氣深萬態更難狀凌空匹練懸
垂壑銀濤漲一峯乍沈浮衆峯漸鼓盪
畫師逞善手薄粉飾丹嶂金碧非俗工
結想千載上

雨後游王氏懺園

濕雲涌西山薄晚蒼翠隔灑街秋雨疎
雨止日未夕言尋槐市園蹶躡振瘦策
入門見頽垣斜照在五礫蟬聲斷續
長樹影參差碧徑草欲齊肩苔痕沒高
屐孤亭一徙倚涼思滿蘿薜自足滌煩
襟誰信炎暑赫微風動絺衣喬木感疇
昔舊慕辟疆名今慚子敬跡

西苑聽蟬

禁苑日舒長深綠潤亭館山禽時弄吭
水鳥亦刷翰鳴蟬喜獨清泉聲應池岸
中有塞外音不與羣翼亂鹿盧疑卷舌
聯續若珠貫誰能譯象鞮焦桐譜殘爨
近年西苑有聲極似蒙古語音故名蒙古蟬
信知皇風遙邊圉汗亦渙昆蟲識朝宗
接翅度海瀚久立塵慮消夕陽隱峯半
荷香逐歸人餘音猶未斷

喜汪西顥來都下畱飲寓齋

秋後苦伏熱緣街少行輪束帶曉獨趨
白汗流絺巾晚歸敲脚臥暫學羲皇民
忽聞剝啄聲相見得故人故人六年別
回首如千春豈無尺素書雲樹隔七閩
此來欣偶合何時去海濱秉燭劇談笑
高歌氣嶙峋乃知意中侶偏於意外親
極歡翻似夢疑信總情真招呼衆同好
流連可十旬

余量本小戶酒亦不計巡微風掃塵翳蔚藍啟秋旻須慮分袂近莫厭握手頻

太和殿早朝

聽鼓晨趨待漏車千官魚貫寂無譁鞭聲乍起簷端爵旗影遙分天半霞殿級香濃開彩扇宮懸風細靜崇牙是日太和

出左掖

花外徐看綵仗移赤墀拜罷各歸遲衣沾涼露辭鼇禁身惹餘煙過鳳池樓迴回瞻雲氣接門凹側聽履聲隨 深宮日旰猶勤政敢說從容退食時

過雙遂亭訪白輝遠員外

白傅遺亭舊人稱履道坊風流千古在交誼兩家長往事

懷書局同官問墨莊平生看山屐此日喜登堂

清瘦虛舟筆簷陰一榜懸亭額為王若霖太史書峯高空疊石池曲

淨流泉老屋遮風雨孤桐洗暮煙重來登傑閣憑檻意悠然

過法源即憫忠寺觀唐蘇靈芝所書寶塔頌碑

長林夾立森蒼官葉聲颯颯風雨寒唐年古寺小巷內兜羅地淨輝朱丹因僧索觀寶塔頌緩步廊腰花影動方碑一片委牆陰歷代已過遼與宋齟齬詰屈讀未全竊嘆奧義難宣研砢然得解如破竹前者當後後者前文言維唐歲作噩天宅幽都鎮戎索璿衡金鏡正乾坤億萬斯年奉龍躍御史大夫哲且賢聿割珍俸崇福田戈鋌地突荷威力幢相建樹徵慈緣功曹參軍為作記胄曹參軍為書字

至今翠墨耀僧房鐵像易州堪竝峙我來不見淨光塔只
向殘碑繞還匝何當更許挾瓊椎竹膜隄麋百番搨日斜
歸鳥喧簷楹禪扉欲閉粥板鳴迴車小巷人寂靜遙看殿
角雲閒橫

游索氏舊園

西苑清嚴地名園作直廬山光晨到幔泉響夜鳴琚共戶
通高幃分堂駐小車信知 恩澤潤侍從盡安居

園自入官後

賜近臣分舍居之

不喚游人入猶容下吏來松根閒繫馬花頂獨登臺曲折
藤梢挂嶙峋石齒迴憑誰殘粉本皴染一縑開
尚識金張舊當年甲第雄笙歌連館榭綺繡炫奴僮炙手
浮華歇迴腸故蹟空惟餘十圍樹猶自吼秋風

閏七月九日蔣質甫司農招同朱玉階編修小餘
平臺望淨業湖三首

北城幽且曠一水通城根遠來韋平第延眺及林園高臺
緣磴上不覺登頓繁瞥然爲俯視已比樓閣尊古木暗茂
樾清流迴漲痕遙知闔闔外曲遶山泉源泉聲流入戶山
色晴當軒此閒信疎豁無復塵市喧

日轡馳羲和閏秋尚早涼風碧樹知葉響殘蟬抱晚藻
斂落紅顛倒箭韞老猶畱萬柄葉濕翠勝蓬葆湖塢作水
田分畝種秔稻眷茲黃茂時益念稼穡寶徒倚憑雕欄橋
影隔隄草鹿鳴閒鶴聲茲境宛瑤島

地官掌邦教職守何繁多維公政優暇皎若絲貫梭退食
招末吏開筵肴核羅亦有門下生相對笑語和逡巡過三

爵顏色各已醜屢感誨語真全忘禮法苛隨意憩磐石脫
帽無喬柯遲回戀清景斜照浮煙波

十一日雨後下直次陳世南學士韻

雲霄星影動羽騎繞山行曙色當樓款荷風拂水生 殿
高窺岫近雨過喜塵清徐見千官集珂聲次第鳴

獨坐接葉樓

事了須閒坐園空不困心小亭倚古木滿地落涼陰窠石
秋來瘦蒼苔雨後深新詩頻索和細看壁閒吟

荅吳中林司馬過近圃見池荷方開寄懷卽次原

韻

小圃無多地詩來述勝游荷香初破夏樹老已鳴秋塵榻
慙嘉客清流羨白鷗何當亭上憩長日聽農謳

陳世南學士招同薄圖南通政高常侍太守汪箕
臺比部高季冶布衣集一經齋食蟹醉後走筆

秋深天色如揉藍日夕官曹罷晚參鸞臺學士雅好客折
簡招呼過巷南棣華姻婭齊入坐郭索登盤似盤大臍團
螯健膏脂肥味美須用薑醢佐自笑卜築曾住魚鰕鄉年
年八月蟹腹飽稻芒邀朋分擘還舉觴不數河豚之白江
蠓黃今年京國走塵土嗜蟹偏來無蟹處幸多漁戶遠搜
羅馬駝車載販秋雨君熟爾雅快大烹頗勝鱸膾與蓴羹
援琴爲君彈秋聲彈作大蟹爬沙行更闌燭跋人醉矣有
酒無詩情曷已狂歌一曲劔斫地負此雙螯兼八跪

秋日同循初季冶澤公堯卿遊萬柳堂晚過夕照
寺分韻得境字

益都昔秉鈞城陰闢幽境穿沼疊阜岡地廣未滿頃聞當
全勝時客半紫薇省余生嗟已晚東望常引領往歲曾數
過林屋尚完整今來秋氣空登涉衣裳冷策杖上高岑臺
危矗雲猛一桁遙山青不盡雙目騁野禽避人飛木老禿
枝梗西風嘯虛堂亂棘埋層嶺井外分蔬畦輓轡轉修綆
菰蒲鳴蕭蕭積水激見影回車叩僧扉落照留餘景烹茶
坐疎寮默聽鐘魚靜龕深有古香熒熒佛火耿徐步心益
清閒吟發悟惺

八月十五日同循初季冶堯卿游黑龍潭遂尋風

氏園

京華三龍潭同德興有滄南城地最邇專祠祭非諂攜朋
趁良辰菜畦走冉冉隔水聞鈴聲到門門晝掩廢砌臥薦

花闕牆吠小獫參差樹根坐靜聽風葉颭還窺方丈池石
井口微奔泉深莫可測細淪自搖澗循崖長菰蒲傍渚多
菱芡平生煙波懷結屋羨草厂復聞風氏園咫尺路不險
舊傳一松古詰屈翠雲染樵斤不宥赦電火幾回閃遂令
梁棟材摧折等桑屨夙願未易酬遺蹟今難檢臨流感盛
衰塵念從此斂

移居宣南坊用蘇東坡書王定國所藏煙江疊嶂

圖王晉卿畫韻

有序

余家世居京師禮髻年讀書城南之孝義鄉榆堡鎮旣乃
僑寄直沽二十年來雖時入青門轉覺如寓客矣今歲夏
就任農曹正陽門外煤市街舊有老屋數椽湫隘不足容
井爨秋九月移居宣南坊庭多雜樹更有古藤數本陰屋

二三閒足供憩息灑掃之暇作詩以簡同志往者田蒙齋
郎中移居粉房巷詩和者徧都下而吾家初白菴主道院
槐窠棗東三集俱以寓齋名卷禮不敢繼踵前輩惟少時
游處之地今得復借一枝聊記歲時不欲概等諸傳舍耳
築堂未得依深山卜廬仍棲九陌煙巷北移居巷南住朝
來家具何紛然入門一笑林木大蕭蕭落葉聒耳如鳴泉
參差瘦石延苔蘚彷彿鞦韆口兼斜川古藤數架蟠屋頂晚
花數種羅階前遙想六月乘涼庭下坐不見赤日行中天
又想春山百卉競開放朱朱白白交暄妍即今秋意稍搖
落景色亦豈輸田園平臺覓句自朝暮空軒讀易忘歲年
急須蒔菊繞窗檻更欲種竹圍嬋娟客來主迎屐可倒客
去主閒林可眠人生俯仰容膝儘已足寧必重樓列觀尋

臞仙移居作詩昔有例况吾故里多前緣揮毫草草投近
局曷不和我遙續南村篇

哭岱瞻釋子

白雲無跡水無心二十年來諡最深棲碧菴成人已歿岱瞻
結棲碧菴於盤山之柴背遊山詩在我空吟丙寅秋余邀岱瞻遊懸題上方二山記游詩刻有集
瓣香有屬秋風冷孤塔長埋暮雨侵他日重尋柴背路幾
行清淚灑松林

九月十日招同王崑霞道士周石帆學士朱玉階
編修申及甫中翰萬循初孝廉高季冶布衣家堯
卿姪於陶然亭補登高分韻得五微有序

登山桓景記出齊諧送菊鍾繇書傳魏帝期過九數敢云
來日無花飲恰八仙共日今朝再舉爰問黑窰中廠如尋

藍水高峯拄笏非遙連山晚翠披襟在望繞 闕晴雲映
寒色於蘆漪奏疎聲於松吹忘言車馬南西門亦是東籬

卽事壺觴兩重陽何拘五字

昨夜西風感授衣攜朋今始叩僧扉憑闌獨有冷然意把

酒何妨送落暉九日纔過黃菊晚十年良會故人稀庚申九月

二日余於陶然亭預作登後期轉瞬猶前約笑指青山莫

高凡十人今惟循初在坐遽違

送高五雲大令之任保安

京國交情舊關山宦跡遙此行驢背雪正度渭南橋

寒夜王崑霞朱崙仲萬循初高季治家堯卿姪集

借舫分韻得九青

羽士通儒術詩人解道經霜風重幔冷岸舫一燈青鍾度

疑潮落更深覺酒醒抱寒吟不穩鑪火似殘星

暮歸自曹署坐古藤籬下閱案牘畢夜深寒甚挑

燈獨酌醉成七言八句

天街奔走少寧居窄巷歸來卸短車煤竈驅寒冬夜寂酒

樽回煖燭光餘事當疑處應參古官到閒時擬著書案牘

雖勞心頗靜何妨吟破五更初

長至前四日周元木上舍過飲筍巢用少陵小至

韻留詩次韻以荅

流光冉冉隙駒催已去年華不復來白首誰新情似夢青

山自老色如灰寒侵古屋身圍火雪壓南枝未著梅且喜

故人閒話久甕頭酒熟盡餘杯

爲顧備九孝廉寄題補溪芙蓉莊有序

芙蓉莊有明顧松菴先生之別業在常熟補溪西三里補溪在虞山之東四十里平橋曲水絕類輞川繞隄叢植芙蓉故以芙蓉名莊松菴為宋處士顧細翁六世孫由烏程簿遷雲和令以平處州劇盜有功遂擢守處州未任卒莊有紅豆樹結子名相思子為細翁手植樹旁立翁祠明末莊歸某尚書繼復歸顧氏今孝廉備九松菴裔孫也涉江未采江南香長歌為詠芙蓉莊芙蓉莊新梅里古遠隔春申黃歇墅虞山東去補溪西客來問花先訪溪污泥不染波如劃君家世世原清白陽水作吏在縉雲君家鄰縣稱神君劇盜就誅同斬草御史書功上上考一麾出守即本州惜哉未展平生籌流傳別業重鄉里一樹相思常結子祠堂霜露薦蘋蘩平泉偶築尚書園尚書詩編紅豆

集不記誰種鸚鵡粒轉電光陰感歲華芙蓉仍作故園花折花笑問芙蓉主花譜何如治縣譜

摩訶菴

初地城西路幽深足嘯歌數聲清磬杳冷翠老松多山暝看雲起僧閒愛客過誰將微妙諦一一證摩訶

十一月四日招周石帆吳樸庭江嶽南萬循初高季治吳驥調宿長兄弟吳鑑南家宣門兄堯卿姪

集古藤移分賦寒林圖

叢木荒原合參差冷色披澹煙橫半樹殘雪在高枝漠漠鴉棲處蕭蕭月射時營邱營未就一望起悲思李成有大小寒林二

圖

小寒前七日同萬循初高季治吳驥調履方仲兄

家立功姪過陶然亭看雪

雪聲一夜鳴天籟雪滿城中復城外曉風嘶馬入城行暮
出城門雪未晴諸公好事耽吟興同上危亭尋曲徑後來
笑我登臨遲不知晚景看尤奇松林何冉冉寒鴉飛點點
茆屋何斜斜寒犬吠家家微茫畧識西山岫倚檻蕭蕭籠
兩袞為問圍鑪煮雪人何如載酒雪中逗是日李向叔家
堯卿並畏寒不
至雪光浮白夜色催琉璃地照琉璃杯陶然亭即無垢國
遠勝羅浮萬樹梅

題循初孝廉玉蓮圖為馬立本孝廉作

海內五嶽何嶽最稱奇二華卓立金天垂層巒疊阜千里
望難盡三峯高削青蓮枝馬君文章抱奇氣遠吞灞澹連
涇渭絕壁峭崿呈駢駢怪壑盤迴隱經緯自言家本新息

侯近代乃始遷邗溝仲宣不忘秦川舊聊藉詩卷當登樓
萬子畫筆尤清瘦畫出河澹一峯秀仙人彷彿局可棋玉
女依稀瀑堪漱我思君文真濯玉井波直成湍激曲成渦
明星祠前列宿二十八一一化為菡萏盡向心胸羅不然
峯頂孤寒勢巖業那得果有如船之藕十丈荷我作狂歌
聲振木何時同跨林閒鹿雲外須尋箭栝門煙中更訪車
箱谷

謝陳秉之相國惠灤鯽

尺半灤河鯽西風乍上層清流想孤竹灤州本名士憶江
孤竹地

陵斫處應成雪攜來尚裹冰翻分鄭相餽臨食感何勝

瀛臺宴進剿金川將士

敵愾蓬婆遠酋稱的博非遐方徵戰士別殿集戎衣行帳

周如屋崇垣靜啟扉盤匱中使肅博碩大烹肥坐比干城
列心隨羽檄飛 恩宥歌湛露功必誓舉旗邊將恭承算
天庭靜握機一麾宣懿德萬里播雄威借箸看摧朽連星
待合圍勒銘知在邇旋見六師歸

調馬歌

訓兵已過日未晏羶帷初卷水邊殿廣場千尺鏡紋平雪
盡苔枯馬足輕魚龍變幻呈百技駐馬欣看調馬戲旗幟
遙如鳥翼開罽策一聲一馬來來馬僅作前騎引紛塵後
騎旋袞袞或如子晉乘丹鸞吹笙空裂天關寒或如宓妃
步羅韞翠羽凌波波滑笏或如舞劍裴將軍劍光翕艷騰
紫雲或如弄丸楚奇士十二參差丸不墜或蹲或立或倒
行或單或疊或參并信知此技古無有草野傳聞駭童叟

方今金川憑虎嵎跳梁小醜猿與狙我軍緣壁青冥上
廟算已成同指掌習勞小試耳目歡搜巢搗穴奚稱難兩
階文德休干戚剋日臣書有苗格

冰嬉曲

嚴寒結水堅如石太液池冰厚逾尺 宸遊樂與民同之
萬幾之暇爲冰嬉踏冰有履履有鐵冰鐵相銜若相齧履
平鐵側走不紆舉趾乃似刀割塗分行結隊辨旗幟五綵
繽紛琉璃地繡絲成簇錦成窠冰人有翼池無波一旗忽
動一行起一行方趨一隊止已誇羣出直於繩更訝飛追
捷於矢復聽喧呼競奪標圓毬鶻上天拋兩眼疾視四
肢勞失勢一跌齊譏嘲忽俯忽仰宛桔槔弄鯁勝玩秋江
濤重排高架懸孤注臂挽雕弓腰白羽髀鳴鐙響毬亂舞

後者欲前前者去以身爲帆足爲櫓旋轉乘風那得住我
皇蒞政閒且勤奏事不廢東西門小臣寓日躬幸親歸家
傳述猶津津何人閉戶抱束薪彼哉夏蟲難與論

同人分賦北地消寒具得煤鑪

西山石炭賤於土小閣嚴寒北風苦召我埏埴工作鑪茶
竈同鑪已紅茶亦熟炭無多火經宿

寄葛摺書

凍雪壓緇塵庭柯分下上折瓊願有貽關山阻且廣葛君
蹤最闊秦薊邈天壤薊門夢迢遙秦川思浩蕩憶昔逐歡
游朝夕恣讌賞苦吟共擘箋痛談卽撫掌妙墨幽古香餘
音奮逸響一日不相見渺若三秋想分手在河干輕風送
蘭槩魚雁各沈浮陳跡感俯仰遑知歲序更但見兒童長

回首覺寒多高情如月朗無梅寄隴頭因詩述疇曩

歲晚荅高澤公見寄之作

筠筒百里寄閒關佳句清於雪後山車馬歲除還似織夢
歸沾上一燈閒

得家星南兄書中有政事以勤爲主冠裳以靜爲
要二語真座右銘也賦此寄謝

拙須補以勤動則制以靜於斯信未能不愧從政吾生
本寡昧黽勉受一命竭蹶恐未遑聲名敢馳競阿兄隔江
介著作衛先聖食貧常自安奉職因我慶尺書走老僕千
里不辭病二語最慤懃洵足周砥行勤當不憚勞靜當恆
主敬傲慢豈近情疎懶本非性韋絃佩兄語官箴盡可屏
執此永無愆兢兢守中正

以新韭冰魚餉薄啟東水部啟東以詩言謝次韻
荅之

印牀官閣閒初鎖琴軫風簾靜可彈小物偶投桃是木清
詩翻博玉爲盤迢迢土室新芽罨栗栗冰河舊網寒更擬
西窗頻剪燭夜闌時對酒杯乾

啟東以家製餅餌見餉賦謝

報贈纔收百顆珠又煩寒具出郇厨重羅細裹經方祕慢
炙勻蒸火候殊作賦有才誰似束當餐無說可慚吳拜嘉
未了兒童飫不羨公羊膾馥腴春秋以公羊爲賣餅家

己巳正月至三月

過太液池

駸駸匹馬走長虹池上樓臺金碧中紅粉牆邊春較射錦

衣人試鳳凰弓

遙青數點見西山解凍風來春已還試看金鼇橋下水堅
冰初泮聽潺湲

正月九日入

見乾清宮

命臣禮

佐郡滇南二十五日復蒙

恩召見

改官粵西恭紀

入官纔半載黽勉勵夙興農曹本繁劇陝右事益增隨班
旅進退自顧無才能何爲祁奚舉翻令後者升軍行正旁
午同憤荆舒懲欲辭我何敢悚惕惟冰兢

晨趨

乾清門百職分行列

楓宸親召見一一賢否別其次分守符其上秉使節就中
滇最遠郡貳有遺缺日惟臣禮宜往哉勿停轍掘衣踖躅

還萬里事羈縶

蠻酋忽革面鐵馬將旋轅轉輸事稍暇各自安鹿轡 九

重宣臣禮六詔可無煩桂林楚南服改調出澧沅引分竊

自思臣本宦邱園離親就遠道烏私誰代言

皤皤白髮親聞之意惆恍寄書重勉勸命兒須速往阿兄

愁遠離即日振鞞鞅握手黯別魂語語關痛痒蓬飄無近

蹤雁飛止遐壤人生出處岐忠孝古難兩

草橋道中

村路平平幾度來短籬孤店少塵埃東風上冢今年早未

見山桃似火開

咫尺都門萬里身草痕從此襯車輪兩行山翠如含睇先

過橋來送遠人

桃花口望西淀

裊娜春林煙吹青入河柳我乘桃花風又到桃花口縈迴

西淀水一鏡映馬首啞啞歸塞鴻斷續落蘆藪微茫見漁

艇遙羨煙波友青莎閒白蘋垂釣且飲酒西沽看漸近去

夏憶分手別來半載餘相隔殊已久奔波慚淵渟蓬轉愧

株守何當租沙田於焉種菱藕

雨中約高常侍太守過近圃看杏花

西郊春水綠於螺小圃新苔碧似莎詩速故人須早過酒

邊聽雨落紅多

循初過嘉樹堂見丁香盛開以詩遙寄次韻奉荅

閉門連日雨如絲檢點行裝懶賦詩回憶筍巢巢外樹丁

香開徧最繁枝

金華書室遺集卷八
故人貽我詩一紙無限相思說此花寂寞春風臺榭冷香
飄春夢隔天涯

寄汪西顥

武昌丹樓霞作堆楚江蘭葉春風催素書一紙魚雁猜懷
人夢繞層城隈青門憶昨暫追陪陣雲秋湧山響雷不眠
共舉深夜杯數年蹤跡窮根荻分袂遽悵東溯洄場苗無
術羈龍馱別後荏苒郭隗臺月輪圓缺珠屢胎憐君弔古
鄂都隕庾亮清談應獨推我愧京華履任纔寓齋未放屋
角梅忽擬天南倚崔嵬身無雙翼空徘徊紛呈剡章舉異
才伯樂顧及駑與駘初疑六詔猶叩嶮旋望五嶺霍陽開
高堂視膳念背鮐稚子牽袂嗟嬰孩行當就程轉自哈捧
檄難復似老萊舊館遑惜荒青苔小築一任生塵埃卻喜
楚粵竝南陔郵筒庶不憚往回荔子堪分浦上栽橘奴豈
少洲邊枚新詩連翩大可裁因君翹首思悠哉

銅鼓書堂遺稿

42 ⁴ ₂ 4

733

銅鼓書堂遺稿卷八

男淳孫林樞校刊

銅鼓書堂遺稿卷八

409

437

4本

5元

律